

四庫全書

史部

欽定四庫全書

史部

御批資治通鑑綱目卷十六

詳校官修撰

臣錢棨

編修

臣程嘉謨

覆勘

總校官降調編修

臣

倉聖

脉

校對官中書

臣

陸

湘

謄錄監生

臣

李敬

敏

欽定四庫全書

御批資治通鑑綱目卷十六

起癸酉漢後主延熙十六年
盡己亥晉武帝咸寧五年

考異

據凡例分註後主
二字當作帝禪

凡二十七年

癸酉十六年

魏嘉平五年
吳建興二年

春正月盜殺大將軍費禕

初姜維攻魏西平獲中郎郭循以為左將軍循欲刺
帝不得近每因上壽且拜且前為左右所遏事輒不
果至是費禕與諸將大會於漢壽歡飲沈醉循刺殺
之禕死愛不疑待新附太過張嶷嘗與書引岑彭來
歛為戒禕不從故及魏追集覽漢壽本廣漢葭萌縣
封循為鄉侯使其子襲爵

梓潼郡晉武帝改晉壽郡今利州是引岑彭來歙為
戒光武時岑彭攻成都公孫述遣人刺之來歙攻蜀

將王元於下辨
質實
西平縣名注見獻帝建安十三
蜀使人刺之年漢壽蜀漢縣名屬廣漢郡晉

改晉壽縣後魏改興安縣置晉壽郡及益州梁改黎
州西魏復曰益州又改利州隋初郡廢後改縣曰綿

谷州為義成郡唐復為利州又改益昌郡五代時唐
改益州宋置寧武軍後置利州路元為廣元路本朝

改為縣屬保寧
府張巖南充人

書法

盜者何降人郭循也麻秋殺苻洪則書故趙
將晉穆帝永和六年循故魏臣也志在復讐

則其書盜何逆順異辭且咎禕也昌為咎之身為
漢大將軍而盜得殺之亦不得不任其咎矣故書

曰大將

軍費禕

發明

此郭循也既為左將軍秩亦尊矣何以書盜彼固盜賊之靡耳循苟欲忠於所事何不

死於見獲之時既受漢爵乃復挾匕首以為姦此正豫子所謂既已委質為臣而又求殺之是二心者也循之所為如此不過微利於魏是特宰竈之下者耳以盜書之夫豈過哉

二月吳諸葛恪擊魏

吳軍還自東興加諸葛恪荆揚二州牧督中外諸軍事恪遂有輕敵之心復欲出軍諸大臣以為數出疲勞固諫不聽中散大夫蔣延固爭恪命扶出因著論以諭衆曰昔秦但得關西耳尚并吞六國今以魏比秦土地數倍以吳蜀比六國不能半也所以能敵之者但以操時兵衆於今適盡而後生者未長又司馬懿陷斃而其子幼弱專國雖有智計之士未得施用是其厄會也若順衆人之情懷偷安之計以為長江

之險可以傳世不論魏之終始而以今日遂輕其後
此吾所以長歎息者也今衆人或以百姓尚貧欲務
閑息此不知慮其大危而愛其小勤者也昔漢祖幸
己自有三秦何不閑關自娛而數出攻楚豈甘鋒刃
而忘安寧哉每鑒荆邯之說近見家叔父陳表未嘗
不謂然也衆人皆心以為不可莫敢復難獨滕胤謂
曰君前破強敵天下震動今猥以勞役之後興師出
征民疲力乏遠主有備若攻城不克野掠無獲是喪
前勞而招後責也且兵者大事事以衆濟衆苟不悅
君獨安之恪又不聽遂大發州郡二十萬衆復擊魏
以滕胤為都督

集覽

荆邯之說先武建武六年公孫
述自帝蜀中荆邯說述起兵家

叔父陳表諸葛亮恪之叔
父也陳表謂所陳出師表

質實

東興隄名注見延熙
十五年滕胤北海人

夏四月姜維伐魏圍狄道

維負其才武欲誘諸羌胡以為羽翼謂自隴以西可
斷而有每欲大舉費禕嘗裁制不從與兵不過萬人
曰丞相猶不能定中夏況吾等乎不如保國治民謹
守社稷如其功業以俟能者無為微倖決成敗於一
舉若不如志悔之無及及禕死
質實
狄道縣名注
維遂將數萬人伐魏圍狄道
見高后六年

吳師圍魏新城不克

初諸葛恪入淮南或曰宜圍新城俟救至而圖之可
大獲也恪從其計魏司馬師問於虞松曰今二方皆
急而諸將意沮若之何松曰昔周亞夫堅壁昌邑而
吳楚自敗事有似弱而強者不可不察也今恪悉其
銳衆足以肆暴而坐守新城欲以致一戰耳若攻城
不拔請戰不可師老衆疲勢將自遁諸將之不進乃
公之利也姜維投食我麥非深根之寇且謂我并力
於東是以徑進今若使關中諸軍倍道急赴出其不

意殆將走矣師曰善乃使郭淮陳泰解狄道之圍救母邱儉等案兵自守以新城委吳泰至洛門維果以糧盡引還魏揚州牙門將張特守新城吳人攻之連月城中兵合三千人疾病戰死者過半而恪起土山急攻城將陷特謂吳人曰今我無心復戰也然魏法被攻過百日而救不至者雖降家不坐自受敵以來已九十餘日矣城雖陷尚有不欲降者我當還為相語條別善惡明早送名且以我印綬去為信吳人聽之特乃夜撤諸屋材柵補其闕為二重明日謂曰我但有鬪死耳吳人大怒進攻之不能拔會大暑吳軍病者大半死傷塗地恪內惟失計忿形於色將軍朱異以軍事迂恪恪奪其兵都尉蔡林數陳計不用策馬奔魏魏諸將伺知其兵已疲乃進救兵七月恪引去士卒傷病流曳頓仆哀痛嗟呼而恪晏然自若詔召相銜徐乃旋師由是衆庶失望而怨讟興矣汝南太守鄧艾言於司馬師曰孫權已沒大臣未附恪不

念撫恤上下以立根基乃競於集覽新城合肥新城外事載禍而歸其亡可待也也堅壁昌邑吳

楚自敗景帝時吳王濞楚王戊反周亞夫堅守昌邑不戰吳楚自叛而去洛門聚名也在水郡冀縣洛

一作落家不坐謂不坐家人之罪柵補編木為營寨曰柵流曳頓仆流謂流離也曳牽引也頓仆僵仆倒

地也蓋喻其士質實一統志云新城在廬州府無為卒傷病之狀州城南一十五里乃三國吳諸

葛恪所築以居新附之人故名新城郭淮陽曲人陳泰潁川人鄧艾棘陽人

冬十月吳殺其太傅諸葛恪以孫峻為丞相

恪還建業陳兵入府即召中書令孫默厲聲謂曰卿等何敢數妄作詔征行之後曹所奏署令長職司一罷更選愈治威嚴多所罪責改易宿衛用其親近復嚴兵欲向青徐孫峻因民怨衆嫌搆恪於吳主亮云

欲為變遂與亮謀置酒請恪伏兵殺之以葦席裹尸
投之石子岡并夷三族臨淮臧均表請聽故吏收葬
從之初恪少有盛名大帝深器重之而恪父瑾常以
為戚曰非保家之子也陸遜常謂恪曰在我前者吾
必奉之同升在我下者則扶接之今君氣陵其上意
蔑其下非安德之基也漢侍中諸葛瞻亮之子也恪
再攻淮南越雋太守張疑與之書曰太傅受寄託之
重而離少主履敵庭恐非良計即君宜進言於太傅
旋軍廣農務行德惠數年之後東西並舉未為晚也
至是果敗○吳羣臣共推峻為太尉滕胤為司徒有
媚峻者言萬機宜在公族乃表峻為丞相大將軍都
督中外諸軍事又不置御史大夫由是士人失望峻
驕矜淫暴國人側目與胤雖內
不洽而外相包容共事如前
集覽 曹所奏署曹謂
奏除署者郎君謂諸葛瞻也杜甫詩郎君玉樹高注
古稱貴人子及身嘗事其父者曰郎君故藩鎮之子

亦呼質實一統志云石子岡在應天府南一十五里
郎君質實吳志建業南有長陵名曰石子岡臨淮郡

名注見新莽天鳳四年越雋
郡名注見武帝元鼎六年

書法恪罪多矣其以無罪書殺何殺不以其罪也
綱目之法雖有罪而殺之不以其罪一以無

罪書之也

吳殺其南陽王和

和妃張氏恪甥也峻因此賜和死張妃亦自殺其妾
何氏曰若皆從死誰當字孤遂撫育其子皓及諸姬
子德謙俊皆賴以全齊王奮聞恪誅欲至集覽德謙
建業觀變傅相諫奮殺之亦坐廢為庶人俊三
子名

甲十七年

魏主曹髦正元元年

考異

按是年九月司馬師廢其主芳十月立髦

此當分注魏嘉平六年主髦正元元年

春二月魏司馬師殺中書令李豐

及太常夏侯玄光祿大夫張緝遂廢其后張氏

初李豐年十七八已有清名其父恢不悅敕使閉門
斷客後司馬師秉政以豐為中書令時太常夏侯玄
有天下重名以曹爽親故不得在執任居常怏怏張
緝以後父家居亦不得意豐皆與親善雖為師所擢
用而心常在玄魏主芳又數獨召豐語師知其議已
詰之不以實告師怒以刀鏢築殺之遂收玄緝下廷
尉鍾毓案治云豐等謀誅大將軍以玄代之緝知其
謀遂皆夷三族并廢張后夏侯霸之入蜀也邀玄與
俱不從及司馬懿薨中領軍許允謂曰無復憂矣玄
歎曰此人猶能以通家年少過我子元子上不吾容

也及下獄立不肯下辭鍾毓夜為作辭流涕示之立
惟頷之而已及就東市顏色不變舉動自若後允出
為鎮北將軍與魏主芳別涕泣獻款師諷有司奏其
罪徙樂浪道死豐帝翼為兗州刺史師遣使收之翼
妻荀氏曰可及詔書未至赴吳何為坐取死亡左右
可同赴水火者為誰翼思未答妻曰君在大州不知
可與同死生者雖去亦不免乃止死○初李恢與尚
書僕射杜畿及東安太守郭智善智于冲有內實而
無外觀州里弗稱也冲嘗與豐俱見畿既退畿嘆曰
孝懿無子非徒無子殆將無家君謀為不死也其子
足以繼其業時人以畿為誤及豐死而冲為郡守卒
繼父業○正始中玄及何晏鄧颺俱有盛名欲交傳
嘏嘏不受荀彧怪而問之嘏曰泰初志大其量能合
虛聲而無實才何平叔言遠而情近好辯而無誠所
謂利口覆邦國之人也鄧玄茂外要名利內無關鑰
貴同惡異多言而始前多言多蒙妬前無親以吾觀

此三人皆將敗家遠之猶恐禍及况昵之乎嘏又以
豐不善謂同志曰豐飾儒而多疑矜小智而昧於權
利若任其事

集覽

斷客猶言絕交也斷徒管反以后
父家居緝以張后父故不得仕子

元司馬師字子上司馬昭字下辭屈服之辭也孝懿
李恢字豐之父君謀郭智字貴同惡異喜人與已同

惡人與

質實

李豐建寧人樂浪郡名注見武帝元封
二年朝鮮杜畿杜陵人東安郡名注見

靈帝熹平三年富春傳叔泥陽人泰初夏侯玄表字
平叔何晏表字玄茂鄧騭表字東市注見晉元帝太
興元年

書法

書臣子廢其后自司馬師始終綱目書
后為臣所廢三魏后晉賈后羊后

發明

豐等書殺而皆不去其官所以正司馬師之
罪然不予其謀誅師者何耶虛名無實之人

非能仗義有為特足以殺其軀而已何足貴哉此固書法之意也

夏姜維伐魏○秋九月魏司馬師廢其主芳為齊王遷之河內冬十月迎高貴鄉公髦立之

魏主芳以李豐之死意殊不平安東將軍司馬昭鎮許昌詔召之使擊姜維九月昭領兵入見芳幸平樂觀以臨軍過左右勸因昭辭殺之勒兵以退大將軍已書詔於前芳懼不敢發司馬師以太后令召羣臣議以魏主荒淫無度褻近倡優不可以承天緒羣臣莫敢違乃奏收璽綬歸藩于齊立彭城王據芳與太后垂泣而別乘王車從太極殿南出羣臣送者數十人太尉司馬孚悲不自勝餘多流涕太后曰彭城王季叔也今來我當何之高貴鄉公文皇帝帝長孫明皇帝弟于於禮小宗有後大宗之義其詳議之師乃更

召羣臣議迎髦於元城髦東海定王霖之子也時年十四師使請璽綬迎之太后曰我見高貴鄉公小時識之欲以璽綬手綬之十月髦至玄武館羣臣奏請舍前殿髦以先帝舊處避止西廂羣臣又請以法駕迎不聽入洛陽羣臣迎拜髦下興答拜賓者請曰儀不拜髦曰吾人臣也遂答拜至止車門左右曰舊乘輿入髦曰吾被徵未知所為遂步至太極

集覽

小宗有後

東堂見太后其日即位百僚皆欣欣焉
大宗之義後猶繼也禮王后無嗣擇建支子以繼大宗記大傳篇別子為祖繼別為宗繼禰者為小宗注別子為祖謂公子若始來在此國者後世以為祖也繼別為宗者別子之世適也族人尊之謂之大宗是宗子也繼禰者為小宗謂父之適也兄弟尊之謂之小宗又注見成帝綬和元年奉大宗後禰者禮大宗伯注云簡進之也疏云出接賓曰賓入詔禮曰相古者諸侯自相為賓之禮各有副賓副曰介主副曰賓

止車門為句車門謂公車府門也公車府掌宮南闕門凡吏民上章及徵詣公車者舊乘輿入謂乘輿而入車門此正誤止車門今按止車門三字門名人臣舊例也至此門則止車而步入唯人君則乘

輿入也又見晉安質實一統志云高貴鄉古地名漢帝義熙五年綱目屬元城縣後魏析置貴鄉縣

屬昌樂郡周於此置魏州隋改置武陽郡唐復置魏州五代唐改為廣晉縣漢改為大名縣宋省入元城縣金於此置屯營元初復置為縣本朝初省後置屬大名府元城縣名注見新莽始建國三年

書法

書廢具主芳遷之迎高貴鄉公髦立之易辭也司馬氏之勢成矣

乙亥十八年

魏正元二年吳五鳳二年

春二月魏揚州都督毋邱儉刺

史文欽起兵討司馬師師擊敗之欽奔吳儉走死

初欽以驍果見愛於曹爽而儉素與夏侯玄李豐善至是皆不自安儉乃以計厚待欽儉子甸謂儉曰大人居方嶽重任國家傾覆而晏然自守將受四海之責矣於是儉矯太后詔起兵壽春移檄州郡以討司馬師又遣使邀鎮南將軍諸葛誕誕斬其使儉將五六萬衆渡淮至項堅守使欽在外為游兵師問計於河南尹王肅肅曰昔關羽有北向爭天下之志孫權襲取其將士家屬羽衆瓦解今淮南將士家在內州但急往禦衛使不得前必有土崩之勢矣時師新割目瘤創甚或謂不宜自行肅又與尚書傅嘏中書侍郎鍾會勸師自行師疑未決嘏曰淮楚兵勁其鋒未易當若諸將戰有利鈍則公事敗矣師蹶然起曰我請興疾而東以弟昭兼中領軍留鎮洛陽師又問計於光祿勳鄭袤袤曰儉好謀而不達事情欽勇而無算今大軍出其不意江淮之卒銳而不能固宜深溝高壘以挫其氣此亞夫之長策也荊州刺史王基言

於師曰淮南之逆非吏民思亂也畏儉等迫脇是以
屯聚若大兵一臨瓦解必矣師從之以基為前軍既
復救基停駐基曰儉等詐謀已露衆心疑沮今不張
示威形以副民望而停軍高壘有似畏懦非用兵之
勢也若儉欽畧民以自益而州郡兵家為賊所得者
更懷離心此為錯兵無用之地而成姦宄之源吳寇
因之則淮南非國家之有矣軍宜速據南頓南頓有
大邸閣計足四十日糧保堅城固積穀先人有奪人
之心此平賊之要也師聽之進據滙水閏月次滙橋
基復曰兵聞拙速未覩巧久議者多言將軍持重持
重非不行之謂也進而不可犯耳今以積實資虜而
遠運軍糧甚非計也師猶未許基曰將在軍君令有
所不受彼得則利我得亦利是謂爭地南頓是也遂
輒進據之儉等亦往爭聞基先到乃還吳孫峻率兵
襲壽春師命諸軍深壁以待東軍之集諸將請進攻
項師曰淮南將士本無反志儉欽欺誘與之舉事小

與持久詐情自露將不戰而克矣乃遣諸葛誕自安
風向壽春胡遵出譙宋絕其歸路儉欽進不得關退
恐壽春見襲計窮不知所為將士家皆在北降者相
屬兗州刺史鄧艾將萬餘人趨樂嘉城儉使欽襲之
師自汝陽潛兵就艾欽猝遇之未知所為其子鵞年
十八勇力絕人謂之曰及其未定擊之可破也於是
分為二隊夜夾攻之鵞率壯士先至鼓譟軍中震擾
師驚駭病目突出恐衆知之嚙被皆破欽失期不應
會明鵞見兵威乃還欽引而東鵞以匹馬拒追騎數
千所向披靡人莫敢逼殿中人尹大目故曹氏家奴
從師行知師目出啟云欽本明公腹心素與大目相
信乞為公追解之乃乘馬追欽謂曰君侯何苦不可
復忍數日中也欽殊不悟乃更怒罵欲射之大目涕
泣曰世事敗矣善自努力儉聞欽退恐懼夜走壽春
亦潰孫峻進至橐臯欽以孤軍無繼不能自立遂詣
峻降儉走慎縣人就殺之傳首京師詔夷儉三族以

諸葛誕為鎮東大將軍都督揚州諸軍事吳軍亦還
儉孫女適劉氏當死以孕繫廷尉司隸主簿程咸議
曰女適人者已產育則成他家之母殺之不足懲亂
源而傷孝子之恩且男不遇罪於他族而女嬰戮於
二門非所以矜女弱均法制也臣以為在室之女可
從父母之刑既醮之婦使從夫家之戮魏朝從之遂
著為集覽

項今陳州項城瘤創瘤力救反赤瘤腫病
也創讀曰瘡亞夫之長策注見前年堅壁

昌邑而吳楚自敗南頓有大郎閭南頓注見光武建
武十九年郎閭倉教之異名也先人有奪人之心左
傳文也注見唐德宗興元元年次潁橋次者兵舍止
之名何休曰次有候也潁倚謹反水出潁川陽城縣
少室山東入潁即汝南潁疆縣有橋在焉安風東漢
實融傳詔以安豐陽泉夢安安風四縣封融為安豐
侯是知安豐安風皆漢縣名也魏陞安豐縣為郡安
風縣廢李春注見秦王政六年燕宋燕春秋為東國

之雋邑秦為譙縣屬沛今亳州是也宋周武王封微
子於宋即今州地漢改梁國隋置宋州今歸德府是
括地志云宋州城本漢睢陽縣也宋城縣在州南索
阜春秋哀十二年公會吳于索阜服虔曰索阜地名
杜預曰在淮南遂道縣東南索章夜反一音託今索
或作拓索隱曰索阜縣名在壽春括地志云索阜故
城在廬州巢縣西北五十六里案巢縣今隸無為軍
嬰毀言被誅也既醮之婦醮冠娶祭名既醮已嫁
也禮凡初昏婿盛服主人告于祠堂遂醮其子而命
之迎婿出乘馬至女家俟于次女家主人告于祠堂
遂醮其女而命之登車記質實諸葛誕琅邪陽都人
昏義注酌而無酬酢曰醮一統志云項漢之縣
名屬河南郡晉屬陳國復屬梁國東魏置北揚州及
秣陵縣北齊信州後周陳州皆治此隋始改為項城
縣屬陳州宋屬淮寧府金仍屬陳州元初省入商水
縣後復置本朝因之改屬開封府王肅東海邾人朗

之子鍾會潁川人繇之子王基曲陽人譙縣名注見
獻帝建安十五年宋古邑名周封微子於此為宋國
秦為碭郡地漢為睢陽縣屬梁國隋置宋州改縣曰
宋城大業初改州曰梁郡唐初為宋州後為睢陽郡
五代梁置宣武軍唐改歸德軍宋陞為南京應天府
治宋城金改府曰歸德復改宋城曰睢陽元因之本
朝降為州以睢陽縣省入改屬開封府汝陽漢之縣
名屬汝南郡即周之沈國地劉宋屬汝陽郡隋初屬
豫州尋改為澠水縣屬陳州又析上蔡縣地別置汝
陽縣省澠水入焉即今縣也唐為蔡州治金仍舊元
省平輿入焉本朝因之為汝寧府治所仍屬焉索阜
地名在廬州府巢縣東北二十里左傳哀公會吳侯
即此慎縣漢初所置屬汝南郡晉屬汝陰郡後省之
故城在鳳陽府潁上縣西北揚州注見秦王政六年

春壽

書法

儉等書討罪師也故師書擊於是吳孫峻率兵將襲壽春欽既攻師敗退聞峻至索卑遽

詣峻降則降吳也書奔吳何為欽諱也

諱欽所以惡師也故儉亦止書走死

發明

司馬師既廢其主罪名暴白儉欽討之雖敗而死然名義則甚正也故書其官書起兵討

師皆所以予之耳陳壽志魏乃以反書儉欽且壽前此以魏為主故於討操之人以反書之今司馬氏反魏者也壽既主魏乃復於為魏討賊之人名以反逆何哉若壽者知有強弱而不知有逆順可謂逆賊之忠臣矣不有君子正色書之則儉欽輩真反者耳

魏大將軍司馬師卒二月師弟昭自為大將軍錄尚書

事考異

提要無二月師三字

師疾篤還許昌昭自洛陽徃省之師令總統諸軍而
卒中書侍郎鍾會從師典知密事魏主覽詔敕尚書
傅嘏以東南新定權留昭屯許昌為內外之援令嘏
率諸軍還會與嘏謀使嘏表上報與昭俱發還屯洛
水南詔以昭為大將軍錄尚書事會由是常有自矜
之色嘏戒之曰子志大其量而勲業難為也可不慎
哉

質實

許昌縣名注見後主建興十一年洛水注見高后三年

秋七月吳孫峻殺朱公主

吳將軍孫儀等謀殺孫峻不克死者數千
人全公主譖朱公主云與同謀峻遂殺之
云全公主全琮之妻朱公主
朱據之妻皆吳大帝之女也

書法

於是孫儀謀殺孫峻不克死不書畧之也而用譖殺先君之女其罪大矣故書殺罪之

質實

按三國志

八月姜維伐魏敗其兵於洮西遂圍狄道不克而還

姜維復議出軍征西大將軍張翼廷爭以為國小民勞不宜黷武不聽維遂將數萬人至枹罕魏雍州刺史王經與戰於洮西大敗死者萬計還保狄道城翼謂維曰可以止矣進或毀此大功為蛇畫足維大怒遂圍狄道魏詔鄧艾行安西將軍與征西將軍陳泰并力拒維泰進軍隴西諸將皆曰王經新敗蜀衆太盛今以烏合之卒當之殆必不可不如據險自保觀禦待敵此計之得也泰曰維輕兵深入正欲與我爭鋒原野求一戰之利當高壁深壘挫其銳氣今乃與戰使賊得計經既破走維若以戰克之威進兵東向據櫟陽積穀之實招納羌胡東爭關隴傳檄四郡此我之所惡也今乃以乘勝之兵挫峻城之下攻守勢殊客主不同吾乘高據勢臨其項領不戰必走矣遂進軍潛行夜至狄道東南高山上多舉烽火鳴鼓角

維不意救兵卒至急攻不克乃遁而還泰每以一方
有事輒以虛聲擾動天下故希簡上事驛書不過六
百里大將軍昭曰陳征西沈勇能斷救集覽洮西洮
將陷之城而不求益兵大將不當爾邪集覽洮西
也洮水注見延熙十二年檄陽注見周顯王八年希
簡上事希罕簡省也恐封上之事繁而擾動天下
質實抱罕縣名注見靈帝中平元年雍州注見唐玄
宗開元十年京兆狄道縣名注見高后六年

冬吳始作太廟

書法

前書魏始建社稷宗廟志潛始也此其書始
何緩辭也吳於是立國改元三十五年矣而

始作太廟特書曰始所以志其慢也綱
目宗廟書始二書初一丁巳年北漢主

丙子十九年

魏甘露元年
吳太平元年

春正月以姜維為大將軍○夏

四月魏司馬昭始服袞冕赤舄質實

袞冕注見平帝元始五年赤舄注見

獻帝建安十八年

○魏主髦視學

初魏主髦宴羣臣於東堂與諸儒論夏少康漢高祖優劣以少康為優至是幸太學與諸儒論書易及禮諸儒莫能及常與中護軍司馬望侍中王沈散騎常侍裴秀及鍾會等講宴於東堂特加禮異魏主性急請召欲速以望職在外特給追鋒車虎賁五人每有集會輒馳而至望孚之子也

質實

司馬孚河

內人王沈晉陽人機之子裴秀聞喜人潛之子

秋七月姜維伐魏與其將鄧艾戰敗績集覽

敗績左傳莊十一年

大崩曰敗績注師徒撓敗若沮岸崩山喪其功績故曰敗績

姜維自狄道還駐鍾提魏人以其力竭未能更出安
西時軍鄧艾曰彼有乘勝之勢我有虛弱之實一也
我上下相習我將易兵新二也彼以船行我以陸軍
三也狄道隴西南安祁山各當有守彼專為一我分
為四四也彼從南安因食羌穀若趣祁山熟麥千頃
五也賊有熟計其來必矣秋維復出祁山聞艾有備
乃回趣南安艾與戰於段谷大質實隴西郡名注見
破之死者甚衆蜀人由是怨維泰王政三年南
安郡名注見建興六年祈山注同上年段谷水名在
蜀界所清水縣東南南山下蜀將姜維為鄧艾敗於
段谷星散
流離即此

書法

不書鄧艾敗
之尊漢也

八月魏司馬昭自為大都督奏事不名假黃鉞

書法

敦操而未盡敢者也然奏事不名與贊拜不名則有間矣終綱目奏事不名一書而已書

假黃鉞始此終綱目書假黃鉞
七黃鉞四詳晉惠帝永熙元年

吳孫峻卒以其從弟綝為侍中輔政

書法

孫峻何遜峻也吳臣卒無不書
官者惟呂蒙孫峻不書削之也

吳大司馬呂岱卒

岱公紀近徐源懷慨有才志岱賜以巾襦與共言論
又公論之或以告岱岱嘆曰是我所以責德淵者也
又源元覽之甚良曰德淵岱之益友今不幸岱復於
河外聞過乎
集覽 巾襦巾首服也襦古侯反單衣也
案單衣即中單實錄曰古者朝燕
年九十六

之服有中單宋文帝令雷次宗以中禱
侍講貴德淵貴重之也徐源字德淵
質實 呂岱廣陵人

冬十月吳孫綝殺大司馬滕胤將軍呂據

吳車騎將軍呂據在江都聞孫綝輔政大怒表薦滕
胤為丞相綝更以胤為大司馬出駐武昌未行據引
兵還約胤共廢綝胤遣從兄憲將兵逆據而使人趣
胤行胤懼勒兵自衛綝表胤反發兵攻圍之或勸胤
曰引兵至蒼龍門將士必委綝就公矣時夜已半胤
特與據期又難舉兵向宮比曉據不至綝兵大會殺
胤夷三族或勸據奔魏據質實 江都縣名注見獻帝
曰吾耻為叛臣遂自殺
質實 興平元年武昌郡名
注見建
興七年

書法

胤據亦孫儀耳則何以書綝
國賊非峻比也故書殺罪之

魏以盧毓為司空

魏以盧毓為司空。毓固讓。司隸校尉王祥詔不許。祥至。孝繼母朱氏遇之無道。祥愈恭謹。朱氏子覽年數歲。每見祥被箠。輒涕泣抱其母。母以非理使祥覽。輒與俱。及長。娶妻。母虐使祥。妻覽。妻亦趨之。母為少止。祥漸有時譽。母深疾之。密使酖祥。覽徑起取酒。祥不與。母奪而反之。後母賜祥饌。覽輒先嘗。母懼。遂止。漢末遭亂。隱居三十餘年。不應州郡之命。母終毀瘁。杖而後起。徐州刺史呂虔檄為別駕。委以州事。政化大行。時人歌之曰：海沂之康，實集覽。母終為句。母之壽賴王祥。邦國不空。別駕之功。集覽終也。海沂素隱曰：沂水出東海。故曰海沂。沂，質實。盧毓，涿郡涿人。植之又注見獻帝建安三年。質實子王祥，琅邪臨沂人。呂虔任城人。

吳孫綝殺將軍王惇

綝負貴倨傲多行無禮惇與峻從弟憲謀殺之事世皆死

書法

於是惇及峻從弟憲謀殺綝綝殺之曷為不書憲憲弟也綱目之意微矣是故孫憲弟也

謀誅綝殺之則不書殺憲而止書殺惇李克寧叔也謀作亂存勗殺之則不書其黨而書殺五代戊辰年輕重之權衡也

丁丑二十年

魏甘露二年
吳太平二年

夏四月吳主亮始親政

吳主亮親政事大將軍孫綝表奏多見難問又科兵子弟十八已下十五已上三千餘人選大將子弟年少有勇力者使將之日於苑中教習曰吾立此軍欲與之俱長數出中書視大帝時舊事問左右侍臣曰

先帝數有特制今大將軍問事但令我書可邪嘗食生梅使黃門至中藏取蜜蜜中有鼠矢召問藏吏藏吏叩頭亮曰黃門從爾求蜜邪吏曰向求實不敢與黃門不服亮令破鼠矢矢中燥因大笑謂左右曰若夫先在蜜中中外俱濕今外濕裏燥

集覽

特制事皆經省而特

有詔制也

書法

始親政何峻專也終綱目書始親政六是年宋乙丑年文帝丁未年魏宏齊辛未年魏宏

陳己卯年周毓壬辰年

周邕皆或專之者也

魏揚州都督諸葛誕起兵討司馬昭六月昭奉其主髦

攻之吳人救之不克而還考異

提要奉作以

誕素與夏侯玄等友善玄等死王凌母邱儉相繼誅滅誕內不自安乃傾帑賑施曲赦有罪以收衆心養輕俠數千人為死士司馬昭初秉政長史賈充請遣參佐慰勞四征且觀其志充至淮南見誕論時事因曰洛中諸賢皆願禪代君以為何如誕厲聲曰卿非賈豫州子乎世受魏恩豈可以社稷輸人若洛中有難吾當死之充默然還言於昭曰誕再在揚州得士衆心今召之必不來然反疾而禍小不召則反遲而禍大不如召之充達之子也詔以誕為司空誕遂殺揚州刺史樂綝歛屯田兵十餘萬及新附四五萬人聚穀足一年食為閉門自守計遣長史吳綱將小子覲至吳稱臣請赦司馬昭奉魏主髦及太后討之吳使將軍全惲全端唐咨等與文欽同救誕六月昭督諸軍二十六萬進屯邱頭使將軍王基陳騫圍壽春圍未合惲等將衆因山乘險突入城昭救基歛軍堅壁基累求進討會吳朱異率三萬人心安豐為歛外

勢詔基轉據北山基曰今圍壘轉固兵馬向集當修
守備以待越逸而更移兵守險使得放縱雖有智者
不能善其後矣遂守便宜上疏報聽於是四面合圍
壘甚峻擊欽異皆破走之秋吳孫緄大發卒出屯
鎧里復遣異等解壽春之圍魏人又擊破之異走歸
緄緄使異更死戰異以士卒乏食不從緄怒斬異而
還緄既不能拔出誕而喪敗士衆自戮名將吳人咸
怨昭乃縱反間言吳救方至大軍乏食勢不能久誕
益寬恣食戢而乏糧外救不至蔣班焦彞誕謀主也
言於誕曰宜及衆心尚固并力決死攻其一面猶有
可全空坐守死無為也誕不聽欲殺之班彞踰城出
降全懌兄子輝等得罪於吳奔魏司馬昭作輝書告
懌等說吳中怒懌等不能拔壽春城欲盡誅
諸將家故逃來歸命懌等遂帥其衆出降

集覽

輕俠

輕去聲不持重也俠之言挾以權力俠質實

賈充襄陵人陳

寧東陽人矯之子安豐縣

名注見光武建武七年

書法

於是誕不就徵殺揚州刺史敵兵自守耳書起兵討何予之也曷為予之誕嘗有死難之

語近於以身殉國者綱目於此不書魏主髦自將書奉其主髦則非髦意而制於昭也明矣故止書攻凡書奉其主云者皆不出於其主者也終綱目書奉其主奉帝四是年晉惠帝太安二年再書永興元年

發明

考之分注誕非純於起義者特迫於內不自安耳然綱目書起兵書討昭畧無貶詞昭既

奉主而行分注曰計而綱目止書曰攻豈自相矛盾哉分注備前史之言而綱目出於特筆故所書如此當是之時司馬昭脇制其君前書自為大都督奏事不名假黃鉞則是篡勢已成於廢放之後

矣天下之人有能奮臂倡義皆君子之所予不違
恤其他故夫急於討賊則凡心跡之純駁人品之
高下事業之成敗皆置不論直欲誅篡逆之人而
後已昭雖挾主為重然皆命在其手豈得謂之奉
辭侯叛此義苟行則如昭等比將無所容於天地
之間而天下後世亦不可以名欺矣故曰綱目脩
而亂臣
賊子懼

姜維伐魏

姜維聞魏分關中兵赴淮南欲乘虛向秦川率數萬
人出駱谷時長城積穀多而守兵少魏都督司馬望
及鄧艾進據之以拒維維數挑戰不應是時維數出
兵蜀人愁苦然周作仇國論諷之曰或問往古能以
弱勝強者其術何如曰吾聖之處大無患者常多慢
處小有憂者常思善多慢則生亂思善則生治理之

常也故周文養民以少取多句踐恤衆以弱斃彊此其術也或曰曩者項彊漢弱約分鴻溝各歸息民張良以為民志既定則難動也率兵追羽終斃項氏豈必由文王之事乎曰商周之際王侯世尊君臣久固深根者難拔據固者難遷當此之時雖漢祖安能仗劍鞭馬取天下乎及秦罷侯置守之後民疲秦役天下土崩於是豪強並爭虎裂狼分疾搏者獲多遲後者見吞今我與彼皆傳國易世矣既非秦末鼎沸之時實有六國並據之勢故可為文王難為漢祖夫民之疲勞則騷擾之兆生上慢下暴則瓦解之形起誘曰射幸數跌不如審發是故智者不為小利移目不為意似改步時可而後動數合而後舉故湯武之師不再戰而克誠重民勞而度時審也如遂極武蹟征不幸遇難雖有智者將不能謀之矣

集覽
秦注見獻帝建安十二年長城即方城也楚之北境括地志云方城山在許州葉縣西南左傳屈完對齊侯

曰楚國方城以爲城杜預曰方城在南陽葉縣之境
山自北陽連百里號曰方城亦曰長城鴻溝注見漢
王劉邦四年疾搏疾急也搏音博手擊也數跌數頻
也跌音迭差跌也審發記射義曰持弓矢審固則射
中矣射求正諸質實志云方城山名在南陽府裕州
己己正而後發
東北四十里左傳楚屈完對齊桓公曰方城以爲城
即此今竹山縣亦有方城山然杜預註云山在葉縣
南則此山是燕
周巴西安漢人

戊寅 景耀元年

魏甘露三年吳景帝孫休永安元年

考異

按是年九月吳孫琳廢其主亮十月

立景帝此當分注吳太平三年景帝孫休永安元年

春二月魏司馬昭拔壽春殺

諸葛誕

文欽教諸葛誕決圍而出不克復還城中食盡降者日衆欽欲盡出北方人省食與吳人堅守誕不聽由是爭恨遂殺欽欽子鶯踰城自歸於魏軍吏請誅之司馬昭曰欽子固應就戮然今以窮來歸且城未拔殺之是堅城內之心也乃使將數百騎巡城呼曰文欽之子猶不見殺其餘何懼又表為將軍賜爵關內侯城中皆喜昭因進軍克之斬誕夷三族誕麾下數百人皆拱手為列不降每斬一人輒降之卒不變以至於盡吳將于詮曰大丈夫受命其主以兵殺人既不能克又束手於敵吾弗取也乃免胄冒陳而死昭初圖壽春王基等欲急攻之昭曰城固衆多攻之必力屈若有外寇表裏受敵此危道也今三叛相聚於孤城之中天其或者使同就戮吾當以全策縻之但堅守三面若吳賊陸道而來軍糧必少吾以輕騎絕其轉輸可不戰而破也吳賊破欽等必成擒矣乃命諸軍按甲以守之卒不煩攻而破議者又以淮南仍

叛吳兵家在江南宜悉坑之昭曰古之用兵全國為上戮其元惡而已吳兵得亡還適可示中國之大度耳一無所殺分布三河近郡安處之昭欲遣諸軍因繫擊吳王基諫曰昔諸葛恪乘東關之勝以圍新城衆死大半姜維因洮西之利輕兵深入軍覆上邽夫犬捷之後上下輕敵輕敵則慮難不深今賊新敗於外又內患未弭是脩備設慮之時也昭乃止以基為征東將軍都督揚州諸軍事時鍾會謀畫居多昭親待日隆委以腹心之**集覽**冒陳冒莫比反犯也陳與任時人比之子房**陣通**三河謂河南河東河內三郡也周禮職方氏河南曰豫州其川滎洛河東曰兗州其川河汴河內曰冀州其川漳上邽注見光武建武八年

姜維引兵還

維聞諸葛
誕死而還

書法

書還何譏也何譏以伐魏出聞殺諸葛而還則斯師也徒乘人之危而已矣故書譏之

夏五月魏司馬昭自為相國封晉公加九錫復辭不受

書法

懿嘗辭九錫矣止書不受此其書復何昭自加之復自辭之詐已甚矣上書自為下書復

辭後書始受所以深誅其心也故自是昭復三命三讓皆削之不書綱目書九錫十四書自為復辭

始受者二司馬昭劉裕受宋之初一轍也

發明

世變日下姦偽日勝自操丕篡漢務為虛詞以惑世至司馬氏又益甚之今昭既自為相

國封晉公加九錫矣又復辭而不受果何意哉亂臣賊子將以文欺天下綱目盡發其姦正色書之

然後手足失墜
如見其肺肝矣

○秋八月魏主髦養老乞言於太學集覽

養老乞言注見明帝永平

二年養
老禮

以王祥為三老
鄭小同為五更
質實

三老五更注見明帝永平二年

書法

養老乞言盛典也髦能行之然亦無救於亂矣終綱目書養老四明帝永平二年是年齊

士申年魏主宏陳登未
年周主邕
惟髦非美辭

九月吳孫綝廢其主亮為會稽王冬十月迎立琅邪王

休休以綝為丞相封兄子皓為烏程侯

孫綝以其主亮親政多所難問稱疾不朝使弟據入宿衛恩幹闇分屯諸營以自固亮惡之陰與全公主將軍劉承謀誅之全后父尚為衛將軍亮使尚子紀語尚嚴整兵馬孤當率宿衛臨橋且曰勿令卿母知女人不曉大事且綝姊也邂逅漏泄誤孤非小紀承詔以告尚尚無遠慮以語紀母母使人密語綝綝夜襲尚執之殺劉承比明遂圍宮亮大怒上馬帶鞭執弓欲出曰孤大皇帝適子在位已五年誰敢不從者近臣共牽止之不得出綝使光祿勳孟宗告太廟廢亮為會稽王以其罪班告遠近尚書桓彝不肯署名綝怒殺之遂迎琅邪王休於會稽遣會稽王亮之國亮時年十六殺全尚遷全公主於豫章綝以休未至欲入居宮中召百官會議皆惶怖唯選曹郎虞記曰明公擅廢立之威誠欲上安宗廟今迎王未至而欲入宮竊恐眾聽疑惡非所以永終忠孝揚名後世也綝不悛而止十月休至羣臣奉上璽符三諫乃受

即日御正殿大赦改元絳稱草莽臣詣關上印綬節
紙求避賢路吳王休慰諭之以為丞相荊州牧○先
是丹陽守李衡數以事侵休其妻習氏諫之不聽休
上書得使會稽至是衡謂妻曰以不用卿言至此吾
欲非說何如妻曰逆叛求活何面目見中國人琅邪
素好善慕名方欲自顯於天下終不以私嫌殺君可
自詣獄表列前失顯求受罪如此當逆見優饒非但
直活而已衡從之詔遣還郡加將軍號授以繁戟又
封故南陽王和集覽思韓閭孫絳三弟名帶鞮鞮君
子皓為烏程侯集覽言反所謂索鞮也禮樂記馬上
曰鞮徒建也弓矢並建立其中也草莽臣草莽猶言
草莽也注見順帝永和三年祭戰注見宣帝甘露三
年質實成宗江夏人桓彝鎮國人丹陽郡名注見明
帝永平十三年李衡武陵人瑯瑯指吳王休
而言烏程縣名注也
晉安帝隆安三年

十二月吳孫綝伏誅

綝奉牛酒詣休休不受齋詣張布酒酣出怨言曰帝非我不立今上禮見拒是與凡臣無異當復改圖耳布以告休銜之恐其有變數加賞賜或告綝反休執付綝綝殺之由是益懼求出屯武昌休許之凡所請求無一違者將軍魏邈說休曰綝居外必有變衛士又告綝反休將討之密問於張布布曰左將軍丁奉雖不能吏書而計畧過人能斷大事乃召奉問計畫奉曰丞相兄弟支黨甚盛不可卒制可因臘會殺兵以誅之十二月臘會綝稱疾休強起之不得已而入奉布目左右綝而斬之以其首令衆諸同謀者皆赦之赦仗者五千人夷綝三族發孫峻棺取印綬斷而埋之改葬諸葛恪及庾據等其懼恪等事遠徙者一切召還宥乞為恪立碑者詔曰盛夏出軍士卒傷損無尺寸之功不可謂能受託寄之任死於豎子之

手不可謂

智遂寢

臘會注見

平帝元始五年臘

質實

丁奉

廬江人

詔漢中兵屯漢壽守漢樂二城

初昭烈定漢中實兵諸圍以禦外敵敵若來攻使不得入其後皆承此制及姜維用事建議以為諸圍適可禦敵不獲大利不若斂兵聚穀退守漢樂二城聽敵入平重關頭鎮守以捍之敵攻關不克千里運糧自然疲乏引退之日然後諸城並出搏之此殄寇之術也於是詔督漢中胡濟却屯漢壽王含守樂城蔣琬守集覽聽敵入平聽從

質實

漢樂二城注見建興七年漢壽縣名注見

延熙十六年

書法

維之失計漢所以亡者也故特書之

巳卯二年

魏甘露四年吳永安二年

春正月黃龍二見魏寧陵井中質

實

寧陵縣名注見秦二世元年

先是魏地井中屢有龍見羣臣以為吉祥魏主髦曰龍者君德也上不在天下不在田而數屈於井非嘉兆也作潛龍詩以自諷司馬昭見而惡之

發明

龍見井中獻以之改元而髦以之自諷亦足以覲二人之識趣矣獻雖克終于位而髦則

不免成濟之禍後世以龍見為祥者可以觀矣

秋八月陳祗卒以董厥為尚書令諸葛瞻為僕射質實

諸葛瞻琅邪陽都人亮之子

祇以巧佞有寵姜維雖位在祇上而多處外權任不及祇

書法

漢蜀諸臣無不具官卒者惟陳祇不書罪之也漢之亂陳祇為之

庚辰三年

魏元帝曹奐景元三年吳永安三年

考異

按魏主髦是年五月被弒六月元帝立此當分

注魏甘露五年元帝曹奐景元元年

春正月朔日食○夏五月魏司馬昭

弒其主髦於南闕下尚書王經死之

魏主髦見威權日去不勝其忿召侍中王沈尚書王經散騎常侍王業謂曰司馬昭之心路人所知也吾不能坐受廢辱今日當與卿自出討之經曰昔魯昭公不忍季氏敗走失國為天下笑今權在其門為日

久矣朝廷四方皆為之致死不顧逆順之理非一日也且宿衛寡弱陛下何所資用而一旦如此無乃欲除疾而更深之邪禍殆不測髦出懷中黃素詔投地曰行之決矣正使死何懼況不必死邪於是入白太后沈業奔走告昭呼經欲與俱經不從髦遂拔劍升輦率殿中宿衛蒼頭宮僮鼓譟而出中護軍賈充入與戰南闕下髦自用劍東欲退太子舍人成濟問充曰事急矣當云何充曰司馬公畜養汝等正為今日今日之事無所問也濟即抽戈前刺髦殞于車下昭聞之大驚自投於地太傅孚奔往枕之股而哭甚哀曰殺陛下者臣之罪也昭入殿中召羣臣會議尚書僕射陳泰不至昭使其舅尚書荀顗召之泰曰論者以泰方舅今舅不如泰也子弟逼之乃入見昭悲慟昭亦對之泣曰元伯卿何以處我泰曰獨有斬賈充少可以謝天下耳昭久之曰更思其次泰曰泰言惟有進於此者不知其次昭乃不復言顗或之子也以

太后令罪狀髮廢為庶人墓以民禮收王經及其家屬付廷尉經謝其母母笑曰人誰不死正恐不得其所以此并命何恨之有及就誅故吏向雄哭之哀動一市王沈以功封安平侯太傅孚等請以王禮葬髮許之昭言成濟大逆不道夷三族

集覽

并命并去聲并命猶言並死言以此而與其主並死夫復

何質實

荀顗潁川潁陰人元伯陳泰表字一統志云安平漢初縣名屬涿郡東漢屬安平國晉置

博陵國北齊為博陵郡治隋置深州後省州以縣屬博陵郡唐又置深州五代宋金皆因之元改曰南平州中統初為安平縣改屬晉州本朝因之改屬真定府向雄河內山陽人

書法

書南闕下何迎而弑之也司馬氏之姦謀豫矣其姦黨衆矣於是經以不俱報昭被殺耳

綱目特書死之以見舉朝皆姦黨也終綱目書死之五十五許孺子嬰居攝元年若弑而死之者五

王經也庾珉王雋也辛賓也顏見遠也宋令詢也

發明

曹髦之殞本以輕舉無謀而見及況唱逆者賁充而抽戈者成濟今但歸獄於昭畧不他

及何哉趙穿親舉挑園之難而春秋正色書盾況昭久操國命特借成濟之手而已雖葬以王禮夷濟三族天下豈可以文欺哉若移以誅昭則君賊賊討始可以成禮墓矣王經始諫其主終罹其禍死得其所宜乎綱目以全節予之也

六月魏主奐立

奐燕王宇之子也本名橫封常道鄉質實常道鄉古公司馬昭迎立之更名奐年十五矣邑名漢初爲常道縣屬燕國後屬渤海郡尋去之故城在順天府東安縣西北

書法

於是昭迎立與不書迎立何罪與也國君新

書之然則魏主濟昌為書濟立宋士民

平濟彌孤也立而討賊則無嫌乎立矣

吳作浦里塘

吳都尉嚴宏建議作浦里塘羣臣皆以為難唯將軍

集覽

漢陽興漢陽興

質實

漢陽興

吳會稽王亮自殺

會稽王亮當選為天子而亮宮人告王所質實會
稽同有惡言吳主遂黜亮為侯官侯亮自殺所質實會
名注見和帝永元元年一統志云侯官漢舊縣名
元鼎中立侯官郡尉屬會稽郡漢末為東侯官縣晉

屬晉安郡隋省入閩縣唐武德中復置此縣元和初復省入閩縣尋復置宋元仍舊本朝因之改屬福州府謠言瀟雅徒歌曰謠言亦作蚤

冬魏以王沈為豫州刺史

沈初到下教曰有能陳長吏可否談百姓所患者給穀五百斛言刺史得失朝政寬猛者給穀千斛主簿陳廩褚碧入白曰教旨思聞苦言示以勸賞竊恐拘介之士或憚賞而不言貪昧之人將慕利而妄舉苟言不合宜不加以賞則遠聽者又未知當否之所在徒見言之不用因謂設而不行告下之事可小須後沈曰興益於上受分於下斯乃君子之操何不言之有碧曰堯舜周公所以能致忠諫者以其款誠之心著也冰炭不言而冷熱之質自明者以其有實也若好忠直如冰炭之自然則謬謬之言將不求而自至

若其不然雖懸重賞忠

集覽

廉虛今反碧力灼反拘介之士拘執守也介廉

潔也後漢仲良統傳得拘潔而失才能非立功之實也顏師古曰自拘束而繫其身者即隱逸之人也貪昧之人漢書荀昧於權利顏師古曰荀昧貪也興益本傳作立德受分分扶問反定分也諤諤之言注見安帝建光元質實張九韶曰曹魏置豫州刺史治譙年蹇諤之節質實縣領潁川汝南沛郡梁國魯國五郡

辛巳四年

魏景元二年
吳永安四年

春三月魏遣兵迎吳降將未行而

罷

魏襄陽太守胡烈言吳將鄧由等十八屯同謀歸化遣使送質詔王基部分諸軍徑造沮水以迎之基遣

司馬昭書言由等可疑狀且曰夷陵東西道皆險阻
竹木叢蔚卒有要害弩馬不陳此事之危者嘉平以
來累有內難當今之宜當務鎮安社稷撫寧上下力
農務本懷柔百姓未宜動衆以求外利昭從之既而
由等果

集覽

沮水沮千餘反括地志云岫冢山水始
出山沮洳因名沮水又云沮水一名川

水源出雍州富平縣東入櫟陽縣漢高於櫟陽置萬
年縣案地理志萬年南有涇渭北有小河即沮水也
韋懷曰沮水出武都郡東狼谷南至沙質實襄陽郡
義南入江夷陵注見周赧王三十七年
齊和帝中興元年雍州一統志云沮水在襄陽府房
縣西南源出景山東流入漢江左傳江漢沮漳楚之
望也

冬以董厥諸葛瞻為將軍共平尚書事樊建為尚書令

時中常侍黃皓用事厥瞻皆不能矯正士大夫多附之唯建不與皓往來秘書令卻正久在內職與皓比屋周旋三十餘年澹然自守以書自娛既不為皓所愛亦不為所憎故官不過六百石而亦不罹其禍帝弟甘陵王永憎皓皓諧之使十年不得朝見吳使薛琬來聘及還吳主問漢政得失對曰主闇而不知其過臣下容身以求免罪入其朝不聞直言經其野民皆菜色臣聞燕雀處堂子母相樂突決棟焚而怡然不知禍之將及

集覽

琬火羽反突決突謂竈突窻決破也

質實

卻正河南偃師

人甘陵國名注見安帝建光元年

鮮卑索頭貢質于魏

鮮卑索頭部世居北荒不交南夏至可汗毛始強大統國三十六大姓九十九後五世至可汗堆寅南遷

大澤又七世至可汗鄰使其兄弟七人及族人乙旌
氏車棍氏分統部衆為十族鄰老以位授其子詰汾
使南遷居匈奴故地詰汾死力微立復徙居定襄之
盛樂部衆浸盛諸部畏服之至是始遣其子沙漢汗
貢于魏因**集覽**索頭鮮卑別部也姓拓拔氏其俗以
留為質索辨髮因號索頭可汗晉穆寒唐高
宗曰今之可汗古之單于也毛可汗名後追尊成皇
帝推寅可汗名後追尊獻皇帝車棍鮮卑別族也棍
古魂反詰汾元魏神元皇帝名定襄古并州之域秦
為太原郡地隋改忻州有定襄縣盛樂雲中郡邑盛
樂音成洛括地志云**質實**定襄縣名注見武帝元朔
故城在并州新興郡**質實**六年一統志云盛樂漢之
縣名屬定襄郡後魏初拓跋力微都此號盛樂唐置
振武軍遼為振武縣北七十里有黑沙磧在焉故城
在大同府西北

書法

索頭始見綱目

壬午五年

魏景元三年吳永安五年

秋八月吳立子璽為太子集覽璽

照釋文案吳錄載休詔曰太子名璽字尚

○冬十月姜

維伐魏洮陽不克

初維將出軍車騎將軍廖化曰兵不戢必自焚伯約之謂也智不出敵而力少於寇用之無厭何以自存維遂伐魏攻洮陽鄧艾與戰於洮和破之時黃皓用事與古大將軍闇宇親善欲廢維樹宇維知之言於帝曰皓姦巧專恣將敗國家請殺之帝曰皓趨走小臣耳往董允每切齒吾常恨之君何足介意維見皓枝附葉連遜辭而出帝敕皓詣維陳謝維由是疑懼返自洮陽因求種麥沓中不敢歸成都集覽

伯約姜維守洮陽縣屬零陵郡括地志云故城在今零陵湘源縣西北洮音滔沓中金城郡河開縣之西

南羌質實一統志云洮陽漢之縣名屬零陵郡隋廢之故城在桂林府全州北三十五里

書法

亮之伐魏也六伐六書其官維於是亦六伐矣皆不書官何罪維也不量力而數勦民綱

目固不得而予之

發明

姜維屢舉伐魏進寸退尺而用兵不已當時智識之士如譙周廖化輩皆為之隱憂然綱

目書之初無貶詞何也用兵以討讐賊固非貪忿私慾之舉若置國賊而不問雖可苟安猶為深耻明乎此則知春秋乾時之戰雖敗猶榮而討賊之義無一日而可忘矣

吳以濮陽興為丞相

欽定四庫全書

新嘉坡通志綱目
卷十六

三

初吳主休在會稽興為太守遇之辱而張布嘗為左
右督將及即位二人皆貴寵用事布典宮省興開軍
國以佞巧更相表裏吳人失望休喜讀書欲與祭酒
韋昭博士咸沖講論布以昭冲切直恐入侍言已過
固諫止之休曰孤欲與昭等講習舊聞亦何所損若
特恐其道臣下竊慮故不欲令入耳如此之事孤已
自備之不須昭等然後解也布皇恐陳謝且言懼妨
政事休曰王務學業其流各異不相妨也然休恐布
疑懼卒廢講業
質實 韋昭雲
不使昭等入

魏司馬昭殺中散大夫嵇康

嵇康字季康
山陰人
少懷才氣
不與物交
好遊於竹林七賢
皆崇尚

康文辭壯麗好言老莊而尚奇任俠與阮籍籍兄子
咸山濤向秀王戎劉伶相友善號竹林七賢皆崇尚
虛無輕蔑禮法縱酒昏酣遺落世事籍為步兵校尉
其母辛方與人園葵對者求止籍留與決賭既而飲

欽之此晉俗之
敝其所由來者
遠矣

酒二斗舉聲一號吐血數升毀瘠骨立居喪飲酒無
異平日司諫何曾面質籍於司馬昭座曰卿縱情背
禮敗俗之人不可長也因謂昭曰公方以孝治天下
而聽籍以重哀飲酒食肉於公座何以訓人宜愼之
四裔無令汚染華夏昭愛籍才常擁護之咸素幸姑
婢姑將婢去咸方對客遽借客馬追之累騎而還伶
尤嗜酒常乘鹿車攜一壺酒使人荷鍤隨之曰死便
埋我當時士大夫皆以為賢爭慕效之謂之放達鍾
會聞康名造之康箕踞而鍛不為之禮會將去康曰
何所聞而來何所見而去會曰聞所聞而來見所見
而去遂深銜之壽為吏部郎舉康自代康與壽書自
說不堪流俗而非薄湯武昭聞而怒之康與東平呂
安親善安兄翼誣安不孝康為證其不然會因詣康
嘗欲助母邱儉與安皆有盛名於世而言論放蕩害
時亂教宜因此除之昭遂殺安及康康嘗詣隱
者除登登曰子才多識寡難乎免於今之世矣

集覽

欽定四庫全書

御批資治通鑑綱目

卷十六

十一

任俠注見武帝元朔二年毀瘠骨立毀瘠瘠瘦而至
於骨立哀痛之甚故也荷鍾荷上聲負也鍾側洽反
鑿也放達注見晉成帝咸和元年箕踞而鍛箕踞傲
坐伸兩足以手案膝其形如箕也鍛小治徐氏曰椎
之而已不消故曰小治質實嵇康其先本上虞人姓
晉書注嵇康善鍊鍛案以避怨徒譙家于鍾
之嵇山因命氏焉阮籍陳留尉氏人瑤之子山濤河
內懷人向秀同上郡人王戎琅邪臨沂人祥之姪劉
伶沛國人何曾陽夏人四裔賈逵曰四裔之地去王
城四千里裔衣裾也徐廣曰裾衣邊也故謂之曰裔
華夏曾鞏曰夏大也中國文明之地故
曰華夏東平郡名注見獻帝興平元年

魏以鍾會都督關中軍事

魏司馬昭患姜維數北伐官騎路遠求為刺客入蜀
從事中郎荀勗曰明公為天下宰宜使正義以伐違

貳而以刺客除賊非所以刑于四海也昭善之遂欲
大舉伐漢朝臣多以爲不可獨鍾會勤之昭諭衆曰
自定壽春以來息役六年治兵繕甲以擬二虜今吳
地廣大而下濕攻之用力差難不如先定巴蜀三年
之後因順流之勢水陸並進此滅號取虞之勢也計
蜀戰士九萬居守成都及備他境不下四萬然則餘
衆不過五萬今絆姜維於沓中使不得東顧直指駱
谷出其空虛之地以襲漢中以劉禪之闇而邊城外
破士女內震其亡可知也乃以會爲鎮西將軍督關
中節度以蜀未有釁屢陳異議昭使人諭之艾乃奉
命姜維表遣左右車騎張翼廖化督諸軍分護陽安
關口及陰平之橋頭以防未然黃皓信巫鬼謂敵終
不自致啟帝寢**集覽**官騎路遣官騎官名也路遺姓
其事羣臣莫知名也滅號取虞春秋僖二年晉
假道於虞以伐號滅下陽五年晉復假道於虞以伐
號滅之師還館于虞遂襲虞滅之

欽定四庫全書



御批資治通鑑綱目

卷十六

三

潁川人真之曾孫陽安關在成都府城東一百五十里陰平縣名注見炎興元年

癸未

炎興元年

魏景元四年吳永安六年○是歲漢亡

考異

提要無分注是歲漢亡四字

春詔立故丞相亮廟於沔陽

亮初亡所在各求為立廟朝議以禮秩不許百姓遂因時節私祭之於道陌上至是校尉習隆等請近其墓立一廟於沔陽以時賜祭其故臣吏欲奉祠者皆至其廟斷其私祠以崇正禮從之
質實一
志云諸葛亮墓在漢中府沔縣東南一十里諸葛亮廟在漢中府沔縣東南八里沔陽縣名注見建興七年

書法

書立廟錄功臣也終綱目功臣書立廟二是年唐玄宗天寶四載李勣武氏之崇恩不與

焉

夏五月吳交趾殺其太守以降魏

吳交趾太守孫諸貪暴會吳主遣使至郡又擅調孔
雀三十頭送建業民憚遠役遂作亂郡吏呂興殺諸
及使人而請更於魏九真日南皆應**集覽**九真在嶺
魏以興為將軍都督尋為其下所殺**南漢武遣**
路博德平南越以其地為九郡九真**質實**格物論云
其一也紫九真本水名因以名郡

廣益諸州所產高四五尺雌者尾短無金翠雄者五
年始成初春而生三四月後復凋與華萼俱榮衰土
人取其尾者持刀於叢篁幽隱處伺過急斷其尾回
首一顧金翠無復光彩矣交趾郡名注見唐宣宗大
中二年九真郡名注同上年日
南郡名注見武帝元鼎六年

秋魏遣鄧艾鍾會將兵入寇關口守將傅僉死之姜維戰敗還守劍閣

魏遣鄧艾督三萬餘人自狄道趣甘松沓中以綴姜維雍州刺史史諸葛緒督三萬餘人自祁山趣武街橋頭絕維歸路鍾會統十萬餘衆分從斜谷駱谷于午谷趣漢中以衛權持節監軍事行鎮西軍司會過幽州刺史王戎問計戎曰道家有言為而不恃非成功難保之難也或以問參相國軍事劉寔曰鍾鄧其平蜀乎寔曰破蜀必矣而皆不還客問其故寔笑而不答八月軍發洛陽陳師誓衆將軍鄧敦謂蜀未可討司馬昭斬以徇漢人遣廖化為姜維繼援張翼董厥詣陽安關口為諸圍外助大赦改元敕諸圍不得戰退保漢樂二城會平行至漢中使兵圍二城徑趣陽安口遣人祭諸葛亮墓使護軍胡烈為前鋒攻關口

守將傅僉拒守其下蔣舒率衆迎降烈乘虛襲城僉格鬪而死會遂長驅而前大得藏庫積穀維聞會已入漢中引兵還艾遣兵追躡於彊川口大戰維敗走還至陰平合衆欲赴關城聞其已破過化冀厥等合兵守劍閣

集覽

甘松地名諸羌之地有甘松嶺韻會注本河關之西南羌地唐置松州以

地產甘松因名焉武街街本作階維梁之域古西戎地戰國時白馬氏因居焉漢代置武都郡西魏立武階郡尋改武州唐置行州又更名階州斜谷注見成帝元延三年褒斜平行安然而行也陰平今文州是漢武開西南夷置陰平道屬廣漢郡晉為陰平郡括地志云鄧艾所出古陰平道在今文州漢陰平也其地與江油為鄰又非隆慶府陰平縣也同谷志云秦蜀出入之道三國漢以為邊陲要厄諸葛亮定之因為西蜀之防劍閣在利州綿谷葭萌二縣諸葛亮相蜀於此立劍門縣案宇記云以大劍山至此有隘東

之路故曰劍門壘石架空為飛閣道以通行路故曰劍閣圖經云大劍山在劍門縣又有小劍山在其西北三十里連山險絕飛閣通劍故名劍閣道至宋以劍門縣隸開中紹興以來劍門關亦列在利州路十七郡質實扶道縣名注見高后六年一統志云甘松古氏羌之地名西漢始置護羌校尉屬河

開郡晉屬汶山郡宋齊因之後周置龍涸郡及扶州治嘉城縣隋郡廢以其地屬汶山同昌二郡唐初於嘉城置松州以其地產甘松故名後置都督府天寶初改交川郡後復為松州廣德初陷於吐蕃至元時始內附本朝初置松潘衛後改松潘等處軍民指揮使司隸四川道祈山注見建興六年武街郡名注見武帝元鼎六年駱谷關名注見延熙七年子午谷注見建興六年衛陞安邑人劉寔平原人陰平道名漢開西南夷置之屬廣漢郡晉置陰平郡永嘉末為氐羌所據始置文州隋廢為縣屬武都郡唐復置文州

天寶初改陰平郡乾元初復為文州屬隴右道宋建
炎以來屬利州路元屬鞏昌路本朝改為文縣守禦
軍民千戶所隸陝西都司劔閣在保寧府劔州北三
十里兩崖峻拔鑿石架閣而為棧道連山絕險故謂
之劔閣秦司馬
錯由此道伐蜀

書法

還守劔閣何著退屯漢壽
之失也漢之滅姜維為之

冬十月吳人來援

遣使告急於吳吳使大將軍丁奉
向壽春丁封孫異向沔中救漢

發明

書人微者也書來援緩詞也是時漢有倒垂
之急吳人苟有救患分災之意則當遣將帥

師鼓行而進如救焚拯溺猶恐弗及今乃僅命丁
奉輩向壽春向沔中而已是果何益於事哉此所

以不書救而書援而又書人以微之也雖然吳人為義不力行亦自及號亡虞舉可勝惜哉吁

魏司馬昭始稱相國晉公受九錫

初昭累辭進位爵賜至是蜀捷交至詔復授之昭乃受命辟魏舒為相國參軍舒少時遲鈍質朴不為鄉親所重從叔父衡有名當世亦不知之使守水碓每嘆曰舒堪數百戶長我願畢矣舒亦不以介意不為校屬之事唯太原王又謂舒曰卿終為台輔常振其德乏舒受而不辭年四十餘郡舉上計掾察孝廉宗黨以舒無學業勸令不就以為高舒曰若試而不中其負在我安可竊不就之高以為己榮乎於是自課百日常習一經對策升第累遷後將軍鍾毓長史毓每與參佐射舒常為畫籌而已後遇朋人不足以舒為數舒容範閑雅發無不中舉生愕然莫有敵者毓歎而謝曰吾之不足以盡卿才有如此射矣及為參

軍府朝辟務未嘗是非至於廢興大事衆人莫能集
斷者舒徐為籌之多出衆議之表昭深器重之

覽

水碓碓春也廣雅曰礪碓也通俗文云水碓曰輻
車杜預作連機碓孔融論曰水碓之巧勝於聖人

之斷木掘地皎厲正義曰皎猶矯也屬猶戾也上計
掾上計者上計簿使也掾官屬也凡郡國每歲盡遣
吏詣京師上計謂奉上戶口錢穀之數朋人不足朋
輩也凡謝者分為兩朋朋人均敵以較勝負偶過其
朋乏一人遂正誤皎厲今按皎顯白也屬嚴峻也魏
以舒補數舒之賢不為矯戾之行不足言矣
質實魏舒任城人太原郡名
注見齊明帝建武三年

衛將軍諸葛瞻及鄧艾戰於綿竹敗績及其子尚皆死
之

鄧艾進至陰平欲與諸葛緒自江油趨成都緒以西
行非本詔遂引兵與鍾會合會欲專軍勢密白緒畏
懦不進檻車徵還軍悉屬會姜維列營守險會攻之
不能克糧道險遠軍食乏欲引還艾上言賊已摧折
宜遂乘之若從陰平由邪徑經漢德陽亭趨涪出劔
閣西百里去成都三百餘里奇兵衝其腹心劔閣之
守必還赴涪則會方軌而進如不還則應涪之兵寡
矣遂自陰平行無人之地七百余里鑿山通道造作
橋閣山高谷深又糧運將匱瀕於危殆艾以糧自裹
推轉而下將士皆攀木緣崖魚貫而進先登至江油
守將馬邈降諸葛瞻督諸軍拒艾至涪不進尚書郎
黃崇屢勸瞻速行據險無令敵得入平地瞻不從艾
遂長驅而前瞻退往綿竹艾以書誘瞻曰若降者表
為琅邪王瞻斬其使列陳以待艾大破之斬瞻及崇
瞻子尚曰父子荷國重恩不早斬黃皓**集覽**江油本
使敗國殄民用生何為策馬冒陳而死

剛氏道地三國魏得其地置江油郡西魏立龍州今
龍州有江油縣奇兵注見周赧王五十五年方軌軌
車轍也方軌言竝軌而進也爾雅云方舟者併兩舟
則此軌亦兩也長驅謂無禦之者顏師古曰猶言直
進質實一統志云江油漢之縣名屬廣漢郡本秦氏
也又置江油郡俱治江油縣隋初郡廢州存大業初
改州為平武郡唐改龍門州天寶初改江油郡乾元
初復為龍州宋改政州後復龍州元仍治江油縣屬
廣元路本朝省州入縣改屬保寧府涪漢之縣名屬
廣漢郡蜀漢屬梓潼郡晉以後屬梓潼巴西二郡西
魏改縣曰巴西置潼州隋初改為綿州後改為金山
郡唐初復為綿州天寶初改巴西郡乾元初復為綿
州宋仍舊元初屬成都府綿竹縣名注見光武建
本朝因之改屬成都府綿竹縣名注見光武建
武十二年德陽縣名注見獻帝建安十九年

鄧艾至成都帝出降皇子北地王諶死之漢亡

漢人不意魏兵卒至不為城守調度聞艾已入平地帝使羣臣會議或勸奔吳或勸入南中譙周以為自古無寄他國為天子者魏能并吳吳不能并魏等為稱臣為小孰與為大再辱何與一辱若欲奔南當早為計今大敵已近羣心無可保者恐發道之日其變不測就能至南遠夷平常無所供給猶數反叛今外當拒敵內供服御耗損諸夷其叛必矣乃遣使奉璽綬詣艾降北地王諶怒曰若理窮力屈禍敗將及便當父子君臣背城一戰同死社稷以見先帝可也柰何降乎帝不聽諶笑於昭烈之廟先殺妻子而後自殺帝別敕姜維使降鍾會又送士民簿於艾戶二十八萬口九十四萬甲士十萬二千吏四萬人艾至成都城北帝率羣臣面縛輿櫬詣軍門艾持節解縛焚櫬延見禁將士無得撻掠輒依鄧禹故事承制拜漢

帝以下官收黃皓將殺之皓賂左右以免維等及諸郡縣圍守得赦放仗詣會降將士咸怒拔刀斫石會厚待維等皆權集覽調度賦調用度也南中諸葛亮還其印綬節蓋本傳曰南中七郡阻險斗絕易

以自守七郡謂犍為牂牁越雋益州武都沈黎汶山也面縛索隱曰面縛者縛手於背而面向前也正義

曰劉氏云面即背也此說稍迂與櫬與共舉也櫬空棺也賈逵曰輿棺從之皆示其君將受死也鄧禹故

事初禹收赤眉賊赤眉望風而降者日質實北地名注見以千數禹所至輒停車駐節以勞來之

秦始皇二十七年一統志云昭烈帝廟在成都府城南二里舊在惠陵右附諸葛亮廟本朝初合廟祀之

書法

書帝出降何不死社稷也故謚書爵書死之

之亡國之善辭也以爲國雖亡不爲無人焉耳終綱目書死之五十四詳孺子嬰居攝元年而國滅

書死之者三國漢之亡也書傳僉諸葛瞻北地王
吳之亡也書張悌涼之亡也書掌據皆亡國之善
辭也周秦亡不書亡此其書漢亡何所以紹昭烈
於高光也獻帝之廢漢未亡也至此而亡矣特揭
書著

之

發明

姜維自都將相喪師處境黃皓寵冠一時殄
民饑凶漢祚顛覆偷生苟免至於死節之臣

乃在傳僉諸葛瞻父子及北地王諶而已是時鄧
艾孤軍深入使漢之君臣能竭力死守未必遽爾
滅亡後主庸才既不知國君死社稷之義譙周諸
人又輕以其子賊其親譙同死社稷之言與大
哭於昭烈之戚而死之節曾大衆之不若嗚呼譙
雖已死其言至今凜凜猶有生氣帝禪有子如此
而不能聽用其言可謂上愧乃父下愧乃子矣傳
寫書爵譙書皇子及其子尚皆書死之所以深褒

亟予為萬世臣子死節者之勸也若夫鄧艾方書至成都即書帝出降所以責帝禪不能死守之罪書漢亡所以見漢之自亡而非艾輩所能滅之也此皆書法之深旨也嗚呼微矣

吳兵還

吳聞漢亡乃罷兵中書丞華覈詣宮門上表曰伏聞成都守社稷傾覆臣以草芥竊懷不寧陛下聖仁必垂哀悼臣不勝忉忉之情謹拜表以聞魏之伐蜀也吳人或謂襄陽張悌曰司馬氏得政以來大難屢作百姓未服今又遠征何以能克悌曰不然曹操雖功蓋中夏民畏其威而不懷其德也不顧承之刑繁役重東西驅馳無有寧歲司馬懿父子累有大功除其煩苛而布其恩惠為之謀主而救其疾苦民心歸之亦已久矣故淮南三叛腹心不擾曹髦之死四方不動任賢使能各盡其心其本根固矣姦計立矣今

蜀闇宦專朝國無政令而玩我黠武民勞卒敝因危而伐殆無不克噫彼之得志我之憂也吳人笑其言至是乃服**集覽**草芥者自喻至微至賤也**質實**華嚴吳郡草芥者自喻至微至賤也

名注見獻帝建安十二年

吳以鍾離牧為武陵太守

吳以武陵五溪夷與蜀接界蜀亡懼其叛亂乃以牧為太守時魏已遣郭純誘動諸夷進攻南陽郡中震懼朝吏以為諸夷阻兵不可以軍驚擾宜遣恩信吏宣教慰勞牧曰不然外境內侵誑誘人民當及其根柢未深而撲取之此救火貴速之勢也即率所領晨夜進道緣山險行垂二千里斬惡民懷異心者凡千餘人純等走**集覽**南陽郡名古蠻荆地槃瓠之後即散五溪皆平

集覽

南陽郡名古蠻荆地槃瓠之後即散五溪皆平

酉水之北質實武陵郡名注見靈帝中平三年五溪

因名焉夷注見建興九年鍾離牧會稽永興
人一統志云酉陽漢之縣名屬武陵郡以縣在酉水
之陽故名晉廢之故城在辰州府城西一十二里

魏赦益州復半租五年

書法

書善魏也滅國復其民終綱目凡再書
是年隋文帝開皇九年復陳境十年

○魏以鄧艾為太尉鍾會為司徒

甲魏咸熙元年吳主孫皓
中元興元年○凡二國春正月魏以檻車徵鄧艾鍾

會謀反伏誅監軍衛瓘襲艾殺之

鄧艾在成都頗自矜伐以書言於晉公昭曰兵有先
聲而後實者今因平蜀之勢以乘吳吳必震恐席卷

欽定四庫全書

御批資治通鑑綱目

之時也然大舉之後將士疲勞不可便用宜留隴右及蜀兵煮鹽興冶竝作舟船豫為順流之事且王劉禪以顯歸命之寵如此則吳人畏威懷德望風而從矣昭使衛瓘喻艾事當須報不宜輒行艾曰元惡既服承制拜假以安初附謂合權宜若待命往復延引日月春秋之義大夫出疆有可以安社稷利國家者專之可也今吳人未賓勢與蜀連不可拘常以失事機兵法進不求名退不避罪艾雖無古人之節終不自嫌以損國家計也鍾會有異志姜維知之欲構成擾亂乃說會曰君自淮南已來算無遺策今復定蜀威德振世欲以此安歸乎何不法陶朱公泛舟絕迹全功保身邪會曰君言遠矣我不能行維曰其他則君智力之所能無煩於老夫矣由是情好懽甚因艾承制專事乃與瓘密白艾有反狀會善效人書於劔閣要艾章表皆易其言令悖傲至是詔以檻車徵艾昭恐艾不從命敕會進軍成都又遣賈充將兵入斜

谷昭自將大軍從魏主幸長安令山濤為行軍司馬
鎮鄴初會以才能見任昭夫人王氏言於昭曰會見
利忘義好為事端寵過必亂不可大任及將伐漢西
曹屬邵悌曰會單身無任不若使餘人行也昭笑曰
我寧不知此邪蜀數為邊寇師老民疲我今伐之如
指掌耳而衆言蜀不可伐夫人心預怯則智勇竝竭
強使之適所以為敵禽耳惟會意與人同今遣伐蜀
蜀必可滅滅蜀之後就如卿慮蜀已破亡遺民震恐
不足與圖事中國將士各自思歸會若作惡祇自滅
族耳不須憂也及昭將之長安悌復曰會所統兵五
六倍於艾但可敕會取艾不須自行昭曰卿忘前言
邪雖然所言不可宣也我要自當以信意待人但人
不當負我耳近日賈護軍問我頗疑鍾會不我答言
如違卿行寧可復疑卿邪我到長安則自了矣會遣
權先至成都收艾會以權兵少欲令艾殺權因以為
艾罪權知其意然不可得距乃夜至成都檄艾所統

諸將稱奉詔收艾其餘一無所問若來赴官軍爵賞如先敢有不出者誅及三族比至鷄鳴悉來赴權唯艾帳內在焉平旦開門權來使者車徑入艾卧未起遂執艾父子置之於檻車諸將圖欲劫艾整仗趣權營權輕出迎之偽出表章將申明艾事諸將信之而止會至成都送艾赴京師會所憚惟艾艾既就擒遂決意謀反欲使姜維為前驅自將隨其後既至長安令騎士從陸道步兵從水道浮渭入河五日可到孟津與騎兵會洛陽一旦天下可定也會得昭書云恐艾或不就徵吾自將屯長安相見在近會驚曰但取艾相國知我獨辦之今來大重必覺我異矣便當速發事成可得天下不成退保蜀漢不失作劉備也會郭太后卒會乃悉召諸將為太后發哀稱遺詔使起兵廢司馬昭更使所親信代領諸軍所請羣官悉閉諸曹屋中權詐稱疾罵出就外解會信之無所復憚維欲使會盡殺北來諸將已因殺會復立故漢帝密

書與帝曰願陛下忍數日之辱臣欲使社稷危而復安日月幽而復明會欲從維言誅諸將猶豫未決會帳下督邱建本屬胡烈會信愛之建慙烈獨坐啟會使聽內一親兵出取飲食烈始語親兵及疏與其子淵曰會已作大坑白楮數千欲悉呼外兵楮殺內坑中一夜轉相告皆偏淵遂率其父兵出門諸軍鼓譟爭先赴城所閉諸人各緣屋出與其軍士相得斬會及維死喪狼籍瑾分部諸將數日乃定父本營將士追出父於檻車迎還瑾自以與會共陷父恐其為變乃遣護軍田續襲父于於綿竹西斬之父之入江油也續不進父欲斬續既而捨之及是瑾謂曰可以報江油之辱矣鎮西長史杜預言於衆曰伯玉其不免乎身為名士位望已高既無德音又不御下以正將何以堪其責乎瑾聞之不候駕而謝預父餘子在洛陽者悉被誅會功曹向雄收塋會屍昭召而責之曰往者王經之死卿哭於東市而我不問會今為叛

欽定四庫全書

御批資治通鑑綱目

卷十六

逆又輒收葬若復相容其如王法何雄曰昔先王掩
骼埋胔仁流朽骨當時豈卜其功罪而後收葬哉今
王誅既加於法已備雄感義收葬教亦無關法立於
上教弘於下以此訓物不亦可乎昭悅與宴談而遣
之會之伐漢也幸憲英謂其夫之從子羊祜曰會在
事縱恣非持久處下之道吾畏其有他志也會請其
子瑀為參軍憲英憂曰他日吾為國憂今日難至吾
家矣瑀固辭不聽憲英謂曰行矣戒之軍旅之間可
以濟者其惟仁恕乎瑀竟以全歸

集覽

拜假服虔曰
除官曰拜仲

馮曰假者權攝之義謂非常置也陶朱公泛舟絕迹
春秋越大夫范蠡以越欲伐吳蠡諫不聽後越竟滅
吳蠡懼誅乃乘扁舟浮于江湖變姓名適齊為鴟夷
子皮後之陶號為朱公徐廣曰陶邑名也濟陰定陶
縣是今東平府平陰縣東三十五里有陶山陶山南
五里朱公冢存焉要父章表於中路要遮鄧艾所奏

章表無任謂無質任也。啟會使聽內一親兵內讀曰納啟白鍾會使聽從胡烈內入親兵一人使出入取飲食給語給誑詐也。語去聲說示之也。疏與疏所實實猶書記也。掩骼埋胔注見漢元帝建昭四年。

杜預杜陵人。畿之孫伯玉衛瓘表字羊祜泰山平陽人。續之孫辛憲英潁川陽翟人。昆之女羊耽之妻。

書法

書襲父殺之何父無罪也。故將士追父迎還不書後以鄧艾孫朗為郎中則書。

發明

春秋滅國雖不一然皆未嘗予之齊師滅譚譚子奔莒書滅譚以惡齊人強暴不義之罪。

書奔莒以責譚子不死于位之失至於齊人滅遂楚人滅黃滅江之類皆止書滅國者之罪而不書見滅者之由先儒謂滅者亡國之善詞上下之同力者也。夫恃強凌弱奪人土地使不得有其臣民毀人宗廟使不得奉其祭祀非至不仁者莫之忍。為劉禪庸愚不能死國貪生苟免固可深責鍾鄧。

臣事弑逆之人吞滅蜀漢以成晉篡有功於昭大
矣其如漢祀何哉思昔昭烈君臣間開隴蜀仗義
討賊不幸天不祚漢逆賊逋誅其子承襲一方少
延赤帝子之祀鍾鄧設謀動衆賊民鋒鏑之下自
謂不世之功未及受賞皆赤其族綱目據事直書
而理自見會以反誅固無可言父本無罪而亦不
免然後知天道昭昭特假手誅夷以償滅漢之罪
爾語曰興滅國繼絕世天下之民歸心焉後之謀
欲滅人家國者可以觀矣

三月魏晉公昭進爵為王考異

當加自字於進爵之上

魏詔晉公昭進爵為王追命其父懿為宣王兄師為
景王太尉王祥司徒何曾司空荀顗共詣晉王顗謂
祥曰相王尊重何侯與朝臣皆已盡敬今日便當相
率而拜無疑也祥曰王公相去一階而已安有天子

三公可輒拜人者君子愛人以禮我不為也及入顓
拜而祥獨長揖昭謂祥曰今日然後知君見顧之重
也

書法

進爵為王何自進也魏公操嘗書之矣於是

理可畏哉綱目於曹馬書
辭多同所以垂萬世戒也

發明

此何不書昭自進爵為王昭躬行弒逆凡在
官者殺無赦人得而誅之魏朝諸臣如王祥

何曾輩拱手事賊又從而加以王爵恬不知耻故
書法如此以見昭弒逆之後雍容爵位雖篡勢已
成亦如平居無事僥進大臣然者所以著魏
朝臣子黨賊之罪爾不然綱目豈予之哉

魏封故漢帝禪為安樂公考異

封當作廢○謹案凡例
封其故君則曰廢後微

禪舉家遷洛陽大臣無從行者惟秘書令卻正及殿中督張通捨妻子單身從行正相導宜適舉動無闕禪乃慨然歎息恨知正之晚漢建寧太守霍弋聞成都不守素服大臨三日諸將勸弋速降弋曰道路隔塞未詳主之安危去就大故不可苟也若魏以禮遇主上則保境而降不晚也萬一危辱吾將以死拒之何論遲速也及得禪東遷之問始率六郡將守上表曰臣聞人生於三事之如一惟難所在則致其命今臣國敗主附守死無所是以委質不敢有貳晉王昭善之妾以奉任封禪為安樂公他日與宴為之作蜀技旁人皆感愜而禪喜笑自若昭謂賁充曰人之無情乃至於是雖使諸葛亮在不能輔之久全況姜維邪他日問禪曰頗思蜀否禪曰此間樂不思蜀也正聞之謂曰若王復問宜泣而答曰先人墳墓遠在岷

蜀乃心西悲無日不思因閉其目會昭復問禪對如
前昭曰何乃似卻正語邪禪驚視曰誠如尊命左右
皆笑

集覽

人生於三謂

質實

建寧郡名注見漢武帝
元狩元年滇國岷山名

之
注見唐德宗興元元年蜀郡
名注見漢後主建興三年

夏五月魏復五等爵

晉王昭奏復五等爵封
騎督以上六百餘人

秋七月魏以羅憲為陵江將軍

初漢伏羅憲守永安及漢敗憲得其主手敕乃帥所
統臨于都亭三日吳聞蜀敗起兵西上外託救援內
欲襲憲憲曰吳不恤我難而背盟徵利不義甚矣乃
繕甲誓衆厲以節義遣使告急於魏吳人來攻與戰

大破之吳主怒復遣陸抗等帥衆三萬增其圍憲被
攻凡六月救援不到或說憲棄城走憲曰吾為城主
百姓所仰危不能安急而棄之君子不為也畢命於
此矣魏遣荊州刺史胡烈攻西陵以救之吳師遂退
晉王昭使仍舊任質實羅憲襄陽人陸抗吳郡人遜
加號將軍封亭侯質實之子西陵縣名注見周赧王

三十
六年

魏使荀顗定禮儀賈充正法律裴秀議官制質實

裴秀
聞喜

人潛
之子

從晉王昭
之請也

發明

充自弒逆之賊而使之正法律
三千之罪果有大於此者乎

吳主休殂烏程侯皓立

吳主腹疾口不能言手書呼濮陽興入令子翬出拜
把興臂指翬託之而卒諡曰景帝吳人以蜀初亡恐
懼欲得長君左典軍萬或嘗為烏程令與烏程侯皓
相善稱皓才識明斷長沙桓王之儔也加之好學奉
遵法度屢言於興及左將軍張布興布說朱太后欲
立皓后曰我家婦人安知社稷之慮苟吳國無隕宗
廟有賴可矣遂迎立之吳主貶朱太后為景質實烏
皇后追諡父和曰文皇帝尊母何氏為太后
將名注見晉安
帝隆安三年

書法

前書吳主權卒尊漢也於
是漢亡矣故休得書殂

八月魏晉王昭以其子中撫軍炎為副相國冬十月立

為晉世子

卷十六

初晉王昭娶王肅之女生炎及攸以攸繼景王後攸性孝友多材藝清和平允名過於炎昭愛之常曰天下者景王之天下也吾百年後大業宜歸攸炎立髮委地手垂過膝羊琇又教以宜察時政所宜損益豫記以備訪問昭欲以攸為世子山濤曰廢長立少違禮不祥實允何曾畏秀曰中撫軍聰明神武有超世之才人望既茂天表如此固非人臣之相也乃立炎為世子

質實

羊琇景獻皇后從父弟也

書法

操書以其子丕為丞相副此書以其子炎副相國書辭若一其示人反復之理深切矣

十一月吳殺其丞相濮陽興左將軍張布

吳主初立發優詔恤士民開倉廩賑貧乏料出宮女以配無妻者苑中禽獸皆放之當時翕然稱為明主

及既得志麤暴驕盈多忌諱好酒色大小失望漢陽興張布竊悔之或譖諸吳主十一月朔興布入朝執之徙於廣州道質實廣州注見晉武帝殺之夷三族

書法

興布小人也書爵書殺何殺不以其罪也綱目之法雖有罪而殺之不以其罪一以殺書

之懲枉濫正刑罰也

魏罷屯田官

乙魏咸熙二年晉世祖武皇帝司馬炎泰始元年吳甘露元年○是歲魏亡晉代凡二國

夏五月

魏晉王昭號其妃曰后世子曰太子

書法

其者何其所謂妃也晉王之有妃宜矣曷為書曰其妃王所自封則其妃亦其所自謂之

云爾已矣故號之曰
后亦書晉王昭號

○秋七月吳主殺景后及其二子○八月魏晉王昭卒

太子炎嗣

諡昭為文王
葬崇陽陵
質實一統志云崇陽陵在
河南府洛陽縣東南

冬吳遷都武昌

從西陵督步
闡之請也

十二月晉王炎稱皇帝廢魏主為陳留王

魏主禪位于晉出舍金墉城太傅司馬孚拜辭流涕
歔歔不自勝曰臣死之日固大魏之純臣也晉王即

皇帝位奉魏主為陳留王即宮于鄴魏氏諸王皆降
為侯追尊宣王景王文王為皇帝尊王太后曰皇太
后

集覽

金墉城在河南郡洛陽故城
西北角三國魏明帝所築

晉大封宗室

晉封叔祖父孚為安平王太宰都督中外諸軍事叔
父伯東莞王弟攸齊王其餘封拜有差伯宣帝之子
也晉主懲魏氏孤立之敝故大封宗室授以職任又
詔諸王皆得自選國中長吏齊王獨不敢皆上請

集覽

伯直又反東莞郡名本漢琅邪國地後魏置北
徐州唐改沂州今沂州沂水縣古東莞也在益

都路莞
音官

質實

一統志云安平漢之縣名屬北海郡東
漢改為東安平縣屬淄川國晉初陞為

安平國後廢之故城在青州府臨淄縣東
一十里東莞國名注見晉安帝義熙五年

晉除漢魏宗室禁錮罷將吏質任

時晉主承魏氏刻薄奢侈之後欲矯以仁儉將有事於太廟朝議以太常許奇父允受誅不宜接近左右晉主乃述允之夙望稱奇之才擢為祠部集覽矯以郎有司言御牛青絲網斷詔以青麻代之集覽矯止其曲也青絲網斷著牛鼻繩所以牽牛者以青絲為之記祭統迎牲君執網注網所以牽牲也音直忍反又以忍反字通作縵禮封人凡祭祀置其縵

晉以傳元皇甫陶為諫官質實

傳元北地人

晉初置諫官以傳元皇甫陶為之元以魏末士風頽敝上疏曰臣聞先王之御天下教化隆於上清議行於下近者魏武好法術而天下貴刑名魏文慕通達而天下賤守節其後綱維不攝放誕盈朝遂使天下

無復清議陛下龍興受禪未舉清遠有禮之臣以敦風節未退虛鄙之士以懲不恪臣是以猶敢有言晉主嘉納使元草詔進之然亦不能革也明年又詔自今雖詔有所欲及奏已得可而於事不便者皆不得情隱

書法

白靈帝之篇書段諫議大夫劉陶及是八十餘年諫官無書者於是書傳元皇甫陶嘉得

人也晉之初政可謂知所先後矣諫官終晉世一書而已是年外此則趙書喬豫和苞為諫議大夫

晉元帝太興二年

丙晉泰始二年
戊吳寶鼎元年
春正月晉立七廟

初漢征西將軍司馬鈞生豫章太守量量生潁川太守儁儁生京兆尹防防生宣帝至是即用魏廟祭征

西府君以下并
景帝為七室

質實

司馬鈞溫人豫章郡名注見漢武帝元鼎五年潁川郡名注見

秦二世三年京兆尹注
見漢武帝泰初元年

晉除郊祀五帝座

羣臣奏五帝即天帝也王氣時異故名號有五自今明堂南郊宜除五帝座從之晉主王肅外孫故郊祀之禮有司集覽王氣王音於況反興也太多從肅議元經云五行用事者王

書法

書予之也始郊見為識漢文帝十五年則除之者為美矣終復復之何惑哉己酉年

三月吳遣使如晉弔祭

吳使者丁忠還說吳主曰北方無守戰之備弋陽可襲而取吳主以問羣臣鎮西大將軍陸凱曰北方新

并巴蜀遣使求和非求援於我也欲蓄力以俟時耳
敵勢方彊而欲徵倖求勝未見其利也吳主雖不出
兵然遂與晉絕質實一統志云弋陽漢之國名治定
凱遜之族子也城縣三國魏改為郡後廢之故
城在汝寧府城東三百里
光州境內陸凱吳郡人

吳殺其散騎常侍王蕃

蕃體氣高亮不能承顏順指吳主不悅萬歲陳聲從
而譖之後吳主會羣臣蕃沈醉頓伏吳主疑其詐斬
之嚴質實王蕃廬
下江人

夏六月晦日食○秋八月晉主謁崇陽陵

文帝之喪臣民皆從權制三日除服既葬晉主亦除
之然猶素冠疏食哀毀如居喪者至是謁陵詔以哀

經從行羣臣自依舊制尚書令裴秀奏曰既除復服義無所依遂止中軍將軍羊祜謂傳元曰三年之喪雖貴遂服禮也而漢文除之毀禮傷義今主上至孝雖奪其服實行喪禮若因此復先王之法不亦善乎元曰以日易月已數百年一旦復古殆難行也祜曰不能使天下如禮且使主上遂服不猶愈乎元曰主上不除而天下除之此為有父子而無君臣也乃止羣臣請易服復膳詔曰每念不得終並經之禮以為此痛況食稻衣錦乎朕本諸生家傳禮來久何至一旦易此情於所天可試省孔子答宰我之言無事紛紜也遂以疏素終三年司馬公曰三年之喪自天子達于庶人此先王禮經百世不易者也漢文師心不學變古壞禮絕父子之恩虧君臣之義後世帝王不能篤於哀戚之情而羣臣諂諛莫肯墜正至於晉武獨以天性矯而行之可謂不世之賢君而裴傳集覽之徒固陋庸臣習常玩故不能將順其美惜哉

衰經衰與練通喪衣也著在冑前長六寸博四寸直
心經徒結反喪首戴也士喪禮疏曰麻在首在要皆
曰經首經以有子麻為之圍九寸要經大七寸有餘
兩股相絞兩頭結之首經象緇布冠要經象大帶衰
之言摧經之言實經中實摧痛也以日易月古者三
年之喪天子與庶人共之文帝遺詔令天下三日皆
釋服宮殿中服大紅十五日小紅十日緣纖七日釋
服應劭曰紅者中祥大祥以紅為領緣纖者禫也三
十六日而釋此以日易月也晉灼曰漢書例以紅為
工顏師古曰紅與工同此喪制者漢文創意為之三
年之喪其實二十七月宜有三十六日之文禫又無
七月也何謂以日而易月乎宜經之禮宜千餘反麻
之有子者也喪服小記注宜者黹也心如斬所貌若
蒼苴所以練裳經杖俱備苴色朕本諸生家言我本
是儒生家所天臣所
天者君子所天者父

書法

朝陵非古也自明帝始矣
不悉書書此嘉孝思也

吳以陸凱萬或為左右丞相

吳主惡人視己羣臣莫敢舉目凱曰君臣無不相識之道若猝有不虞不知所赴吳主乃聽凱視吳主居武昌揚州民汴流供給甚苦之又奢侈無度公私窮匱凱上疏曰今無災而民命盡無為而國財空臣竊痛之昔漢室既衰三家鼎立今曹劉失道皆為晉有此目前之明驗也臣愚但為陛下惜國家耳武昌土地險瘠非王者之都且童謡云寧飲建業水不食武昌魚寧還建業死不止武昌居此足明民心與天意矣今國無一年之蓄有露根之漸而官吏務為苛急莫之或恤大帝時後宮女不滿百景帝以來乃有千數此耗財之甚者也又左右率非其人羣黨相挾害忠隱賢此皆蠹政病民者也願陛下省百役罷苛擾

料出宮女清選百官則天悅民附而國集覽露根之
安矣吳主雖不悅以其宿望特優容之集覽漸露暴
露也根本也國以民為本謂國無蓄積則民漸至流
離暴露也北史陸凱傳曰民者國之根誠宜重其食
命愛其

冬十月朔日食○十一月晉并圓方丘之祀於南北郊

○晉罷山陽督軍除其禁制○十二月吳還都建業

吳主還建業使后父衛將軍滕收留鎮武昌朝士以
收尊戚推令諫諍滕后之寵由是漸衰遷收蒼梧以
憂死后不復進見諸姬姬佩皇后璽綬者甚眾又使黃
門徧行州郡料取將史家女其二千石大臣子女皆
歲歲言名簡閱集覽璽綬前書諸侯王表奉上璽綬
不中乃得出嫁集覽注穀與綬同綬也所以繫璽

質實

蒼梧郡名注見漢武帝元鼎五年

丁晉泰始三年春正月晉立子衷為太子

亥吳寶鼎二年詔以近世每立太子必有赦曲惠小人朕無取焉遂不赦○有司奏東宮施敬二傳其儀不同晉主曰崇敬師傅所以尊道重教也何言臣不臣乎其令太子中拜禮

晉殺其故立進令劉友

司隸校尉李熹劾奏故立進令劉友及前尚書山濤中山王睦尚書僕射武陔各占官稻田詔曰友侵剝百姓其考竟以懲邪佞濤等不貳其過皆勿問熹亢志在公當官而行可謂邦之司直矣其中敕羣僚各慎所司寬宥之恩不可數遇也司馬公曰政之大本在於刑賞刑賞不明政何以成晉武帝赦山濤而褒

李燾其於刑賞兩失之矣使其言是則濤不可赦非則燾不足褒褒之使言言而不用怨結於下威玩於上將安用之且四臣同罪友伏誅而濤等不問避貴施賤可謂政乎

集覽

立進縣名質未詳處所

實

李燾銅鞮人武陟沛國人

書法

友占官田罪也以無罪書殺何譏偏也於是李燾奏友及前尚書山濤中山王睦尚書僕

射武陟各占官田以為非罪則皆無罪也而獨殺友是殺無罪也故以殺書之

晉徵犍為李密不至

晉主徵犍為李密為太子洗馬密以祖母老固辭許之密與人交每公議其得失而切責之常言吾獨立於世顧影無儔然而不懼

集覽

洗馬洗與先通音蘇典反前也前書百官

表太子太傅少傅屬官有先馬注如淳曰先或作洗
後書志太子洗馬職如謁者太子出則當直者在前
導威儀也國語曰句質實健為郡名注見漢
踐親為夫差洗馬光武建武十二年

夏六月吳作昭明宮

吳主作昭明宮二千石以下皆自入山督伐木大開
苑園起土山樓觀窮極伎巧功費以億萬計陸凱諫
不聽中書丞華覈上疏曰今倉庫空匱編戶失業而
北方積穀養民專心東向乃舍此急務盡力功作卒
有風塵之變驅怨民而赴白刃此乃大敵所因以為
資者也時吳俗奢侈覈又上疏曰今民貧俗奢轉相
倣倣兵民之家內無甌石之儲而出有綾綺之服上
無尊卑等級之差下有耗財費力之損求其富給庸
可得乎集覽甌石甌都甘反罌也又擔質實一統志
皆不聽石注見漢桓帝延熹五年云昭明

宮在應天府臺城
內太初宮之東

秋九月晉增吏俸○晉禁星氣讖緯之學

書法

星氣讖緯曲學也自光武宣布圖讖而東漢

矣書予之也書禁圖讖始此終綱目書禁圖讖四
是年孝武帝寧康三年癸丑年魏齊文帝開皇

十三年

○晉遣索頭質子歸國質實

索頭鮮卑別部名注
見漢後主景耀四年

戊晉泰始四年
子吳寶鼎三年 春正月晉律令成

賈充等上所刊修律令晉主親自臨講中書
侍郎張華請抄死罪條目懸以示民從之 質實張華

范陽方
城人

書法

凡書成久辭也自魏書使賈充正律令至是而咸五年矣綱目法律書成三是年齊辛酉

年魏新律成
辛未年律書成

晉詔立考課法不果行考異

提要無
詔字

詔河南尹杜預為熙陽之課預奏古者黜陟擬議於心不泥於法末世不能紀遠而專求密微疑心而信耳目疑耳目而信簡書簡書愈繁官方愈偽魏氏考課即京房之遺意其文可謂至密然失於苛細以違本體故歷代不能通也豈若中唐堯臣舊制取大捨小去繁就簡委任達官各為所統歲申其人言其優劣如此六藏主者總集採案其言六優者超擢六劣者廢色優多劣少者平叙劣多優少者左遷其間所對

不鈞品有難易主者固當準量輕重微加降殺不足
曲以法盡也其有優劣徇情不協公論者當委監司
彈之若令上下公相容過此為清議大集覽京房之
類雖有考課之法亦無益也事竟不行
意有京房之遺風也漢元
帝時京房奏考功課吏法

晉主親耕藉田○三月晉太后王氏殂考異

按崩葬例曰僭國之

君稱帝曰某主姓某卒后夫人因事而見者曰某號某
氏卒無統之君稱帝者曰某主某殂其后夫人如僭國
例則此當書晉太后王氏卒傳錄誤作殂耳是後泰始
十年書晉后楊氏殂亦誤凡南北五代書太后殂書后
殂並當作卒
今不能悉見

晉主居喪一遵古禮既葬有司請除喪服詔曰受終
身之愛而無數年之報情所不忍也有司固請詔曰

患在不能篤孝勿以毀傷為憂前代禮典質文不同
何必限以近制使達喪闕然乎羣臣請不已乃許之
然猶素服以終三年

夏四月晉太保王祥卒

祥卒門無雜帛之賓其族孫戎歎曰太保當正始之
世不在能言之流及間與之言理致清遠豈非以德
掩其言乎

秋七月衆星西流如雨而隕○九月晉大水○晉揚州
都督石苞罷

晉大司馬揚州都督石苞久在淮南威惠甚著監軍
王琛惡之密表苞與吳通晉主遣義陽王望帥大軍

徵之芑保孫鑠在許昌聞之或勸鑠無與於禍鑠馳詣壽春勸芑放兵步出都亭待罪晉主聞之意解芑以公質實石芑渤海南皮人淮南郡名注見漢武帝還家質實元朔五年許昌縣名注見漢後主建興十

一年壽春縣名注見秦王政六年

已晉泰始五年春二月晉以胡烈為秦州刺史

先是鄧艾納鮮卑降者數萬置雍涼之間與民雜居朝廷恐其久而為患乃分雍涼梁州置秦州以烈素著名西方故質實秦州注見漢光武使鎮撫之建武元年天水郡

晉青徐兗州大水

書法

去年晉書大水矣於是復大水而連數州焉變異可謂頻矣綱目書大水六十三連數州

郡者十有一是年太康四年惠帝元康五年八年
隋煬帝大業七年唐太宗貞觀七年八年中宗神
龍元年德宗貞元八年宣宗大
中十二年懿宗咸通十四年

晉以羊祜都督荊州軍事

晉主有滅吳之志使祜都督荊州鎮襄陽東莞王仙
都督徐州鎮下邳祜綏懷遠近甚得江漢之心與吳
人開布大信降者欲去皆聽之滅戍邏之卒以墾田
八百餘頃其始至也軍無百日之糧及其季年乃有
十年之積祜在軍常輕裘緩帶身不
被甲鈴閣之下侍衛不過十數人
祭以警質實襄陽縣名注見漢獻帝建安十二
防不虞質實年下邳縣名注見漢高帝六年

晉錄用故漢名臣子孫

集覽

鈴閣都督
閣內置鈴

濟陰太守文立言故蜀名臣子孫宜量才叙用以慰
巴蜀之心傾吳人之望晉主從之詔曰諸葛亮在蜀
盡其心力子瞻臨難死義其孫京宜隨才署吏蜀將
傅僉父子死於其主息著募沒入奚官宜免為庶人
又以立為散騎常侍漢故尚書程瓊雅有德業與立
深交晉主聞其名以問立對曰臣至知其人但年垂
八十稟性謙退無復當時之望故不以上聞耳瓊

集

覽

息著募沒入奚官通鑑釋文曰息謂傅僉之子姓
也史釋是矣或解息為兒子非也記玉藻篇子姓

之冠疏云孫之子之所生故曰子姓又喪大記注子
姓謂衆孫也著募二字疑是二息名斷沒為官奴婢
也奚官屬內侍省禮天官酒人奚三百人注古者從
坐男女沒入縣官為奴其少才知以為奚今之侍史
官婢或曰奚宦女

正誤

息著募沒入奚官今按史家
多指子為息如左師觸龍云

也奚又胡禮反

賤息舒祺東海王彊云息政小人之類傳僉以炎所負興元年戰死至是纔七年安知沒官者非其子邪

實

文立字廣休巴郡人

書法

故漢名臣何葛傳之儔也錄其子孫晉於是能勸善矣故書予之

秋九月有星孛于紫宮○冬十月吳左丞相陸凱卒

初何定嘗為大帝給使自表舊人求還內侍吳主以為都尉典知酤糶遂專威福吳主信任之委以衆事凱面責之曰卿見前後事主不忠傾亂國政寧有得以壽終者邪宜自改厲不然方見卿有不測之禍定大恨之凱竭心公家忠懇內發表疏皆指事不飾及疾病吳主遣中書令董朝問所欲言凱陳定不可用奚熙小吏建起浦里塘亦不可聽姚信樓玄賀邵張悌郭遵薛瑩滕脩及族弟喜抗或清白忠勤或資才

卓茂皆社稷之良輔願訪以時務使各盡其忠凱尋
辛吳主素術其切直且聞何定之譖徙其家建安

集覽

奚熙小吏
姓名也

質實

樓玄沛人賀邵會稽人一統志
云建安郡名周為七閩地秦屬

閩中郡漢為東冶縣地屬會稽郡東漢置會稽南部
都尉三國吳罷都尉置建安郡治建安縣晉以後因
之隋廢郡以縣隸泉州大業初屬建安郡唐武德中
置建州治建安縣天寶初改建安郡乾元初復為建
州五代時閩置鎮安軍節度又改鎮武軍南唐改永
安軍尋改忠義軍宋端拱初改軍曰建寧紹興末陞
為建寧府元改置建寧路本
朝復為建寧府隸福建道

寅
晉泰始六年

夏四月吳以陸抗都督諸軍治樂鄉質

寅

樂鄉城名注見
康帝建元元年

欽定四庫全書

御批資治通鑑綱目

抗以吳主政事多關上疏曰德均則衆者勝寡力侔則安者制危此六國所以并於秦西楚所以屈於漢也今敵之所據廣於秦漢而國家外無連衡之援內無西楚之彊庶政凌遲黎民未乂議者徒以長江峻山限帶封域此乃守國之末事非智者所先也臣每念及此中夜撫枕臨餐忘食夫事君之義犯而勿欺謹陳時宜十七條吳主不納何定使諸將各上御犬一犬直緣數十匹纓直錢一萬以捕兔供厨吳主以為忠賜爵列侯抗上疏曰小人不明理道所見既淺雖使竭情盡節猶不足任况其姦心素寫而憎愛移易哉吳主不從

六月晉胡烈討鮮卑秃髮樹機能敗死考異

此當書擊誤作討

集覽

秃髮樹機能鮮卑俗稱婢曰秃髮其先乃婢因以為氏史曰其先壽闡之在孕母相掖氏因寢而產

於被中鮮卑俗謂被為禿髮後因
而氏焉樹機能名也壽闡之孫

辛晉泰始七年春正月晉匈奴右賢王劉猛叛走出塞
卯吳建衡三年

○晉豫州刺史石鑒有罪免

鑒坐擊吳軍虛張首級詔曰鑒備大臣吾所取信而
乃下同為詐義得爾乎今遣歸田里終身不得復用

質實

石鑒厥次人豫州注見
周赧王三十六年陳

吳主大舉兵遊華里不至而還考異

提要漏
主字

吳人刁玄詐增識文云黃旗紫蓋見於東南終有天
下者荆揚之君吳主信之大舉兵出華里載太后及
後宮數千人西上行過大雪兵士寒凍集覽
殆死皆曰若遇敵便當倒戈吳主乃還集覽
丁老反

戈平頭戟倒戈謂倒以戈柄授人而反自攻其後也
今喻人自攻其黨曰倒戈書武成前徒倒戈攻于後
北以正誤華里今按華里在建業西

書法

遊未有書大舉兵者書大舉兵何識勞人也

也此書不至而還其美之歟危之也於是大雪兵
士寒凍殆死皆曰遇敵便當倒戈吳主乃還綱目
遊幸書不至書不果皆美也惟此為危辭終綱目
遊幸書不至二漢明帝永平四年是年書不果行

一唐高宗
繼章二年

發明

兵者國之重事其可輕動乎綱目上書大舉
兵書遊華里則吳主以兵為戲蓋可知矣其

不亡
得乎

夏四月晉涼州胡叛刺史牽宏討之敗死考異

此亦誤書討與

上討鮮卑同

初大司馬陳騫言於晉主曰胡烈牽宏皆勇而無謀彊於自用非綏邊之才也將為國耻晉主以為騫與宏不協而毀之不信也至是烈既敗死宏討叛胡與樹機能攻宏殺之征討連年僅而能定晉主乃悔之

質實

陳騫東陽人騫之子

秋七月吳復取交趾

吳三攻交趾皆敗沒至是遣陶璜李勗等擊取之九月日南皆降以璜為交趾牧璜討降夷獠州境皆平

集覽

交趾注見漢武帝元鼎六年日南注同上

質實

欽定四庫全書

御批資治通鑑綱目

卷五

陶璜秣陵人基之子

冬十月朔日食○十一月劉猛寇晉并州質實

并州注見齊明

帝建武三年○晉安樂公劉禪卒

諡曰思

書法

書卒何予存厚也於是漢亡八年矣

壬晉泰始八年春正月匈奴殺劉猛降晉○二月晉太

子衷納妃賈氏

初侍中尚書令賈充自文帝時寵任用事晉主為太子充頗有力故益有寵充為人巧諂與太尉荀顗侍

中荀勗越騎校尉馮純相為黨友朝野惡之晉主問
侍中裴楷以方今得失對曰陛下受命四海承風所
以未比德於堯舜者以賈充之徒尚在朝耳宜引天
下賢人與弘政道不宜示人以私侍中任愷河南尹
庾純皆與充不協會樹機能亂秦雍晉主以為憂愷
曰宜得威望重臣有智畧者以鎮撫之晉主曰誰可
者愷及純因薦充使督秦涼諸軍充患之問計於勗
勗曰是行也辭之實難獨有結婚太子可不辭而自
留矣晉主初欲為太子娶衛瓘女充妻郭槐賂楊后
左右使后說納其女晉主曰衛公女有五可賈公女
有五不可衛氏種賢而多子美而長白賈氏種妬而
少子醜而短黑后固以為請至是勗又與顗純皆稱
充女絕美且有才德晉主遂從之留充復居舊任賈
妃年十五長太子二歲妬忌多權詐太子嬖而畏之

集覽

統

都

質實

人

庾純

安平人

任愷

博昌

人

峻

之弟

書法

太子納妃不書此其書何志亂始也終綱目書太子納妃三晉賁妃宋江氏周楊氏皆有

也故

發明

太子納妃罕書而此書之者所以志亡晉之本又且逆賊之女也

晉太宰安平王孚卒

孚性忠慎宣帝執政常自退損後逢廢立之際未嘗預謀及晉主即位恩禮尤重元會詔孚乘輿上殿晉主於阼階迎拜既坐親奉觴上壽如家人禮孚雖見尊寵常有憂色臨終遺令曰有魏貞士河內司馬孚字叔達不伊不周不夷不惠立身行道終始如一當衣以時服歛以素棺卒年九十三諡曰獻詔賜東園溫明秘器其家遵集覽東園溫明秘器案後書禮儀遺旨一不施用志藏明器數筭八甕三甌二

瓦鐙一形弓一形矢八厄八牟八豆八簋八酒壺八
槃匣几杖各一蓋一鍾磬各十六鑄四簫四埙篪笙
祝敔琴瑟箏筑塤篪干戈箏甲冑各一輓車九乘芻
靈三十六瓦竈二瓦釜二瓦甑一瓦鼎十二甑杓三
瓦案九瓦大杯十六小杯二十五飯樂十瓦
酒尊二又東園秘器注見漢哀帝建平四年

晉散騎常侍鄭徽以罪免

晉主與右將軍皇甫陶論事陶爭辯不已徽請罪之
晉主曰忠讜之言唯患不聞徽越職妄奏可免其官
書法於是皇甫陶論事爭辯不已徽請罪之帝以
徽越職妄奏免其官網目特書以罪免所以
示面諛者
之戒也

夏晉益州殺其刺史廣漢太守王濬討平之以濬為益

州刺史

卷十六

時汝山白馬胡侵掠諸種益州刺史皇甫晏欲討之
從事何旅諫曰胡夷相殘未為大患盛夏出軍必有
虞矣不聽牙門張宏作亂殺晏兵曹從事楊倉勒兵
戮之宏遂誣晏欲反傳首京師主簿何攀方居母喪
聞之詣洛證晏不反廣漢主簿李毅言於太守王濬
曰廣漢與成都密通而統於梁州者朝廷欲以制益
州之桢領正防今日之變宜即時赴討不可失也濬
欲先上請毅曰殺主之賊為惡尤大當不拘常制何
請之有濬乃發兵討宏斬之詔以濬為益州刺史初
濬為羊祜參軍祜深知之或曰濬為人志大奢侈不
可專任祜曰濬有大才將以濟其所欲必可用也濬
至益州明立威信蠻夷歸附俄遷大司農時晉主與
羊祜謀伐吳祜以為宜藉上流之勢密表留濬加龍
驤將軍監梁益軍詔使罷屯田兵大作舟艦別駕何

攀曰屯兵五六百人作船不能猝辦後者未成前者
已腐宜召諸郡兵合萬餘人造之歲終可成濬欲先
上須報攀曰朝廷猝聞召萬兵必不聽不如輒召設
或見却功夫已成勢不得止濬從之令攀典造於是
作大艦長百二十步受二千餘人以木為城起樓櫓
開四出門其上可馳馬往來時作船木杙蔽江而下
吳建平太守吾彥取以白吳主曰晉必有攻吳之計
宜增建平兵以塞其衝吳主不從彥乃為鐵鎖橫斷
江路濬雖受中制募兵而無虎符廣漢太守張覈收
濬從事列上晉主召覈還責曰何不密啟而便收從
事覈曰蜀漢絕遠劉備嘗用之**集覽**白馬胡西南夷
矣輒收臣猶以為輕晉主善之種名在汶山郡
案汶山今茂州是屬成都舟艦戶熟反戰船也四方
施板以禦矢其狀如牢樓櫓櫓通作櫓城上守禦望
樓也釋名曰櫓露也上無屋覆虎符漢文初與郡國
為銅虎符應劭曰銅虎符第一至第五國家當發兵

遣使至郡合符符合乃聽受之索隱曰漢舊儀銅虎符長六寸顏師古曰與郡國為符者各分一半右留京師左以與之此漢制也後皆因之列質實汶山郡上句絕陳列而封上輒收句絕輒便也名注見漢武帝元鼎六年一統志云益州古為蜀國秦置蜀郡漢分置廣漢郡武帝置益州蜀郡王莽改益州曰庸部蜀郡曰導江東漢州郡復舊蜀漢都於此於益州置牧蜀郡置守晉武帝改蜀郡為成都國尋復蜀郡宋齊蜀郡皆隸益州後周置益州及蜀郡隋初罷郡大業初復罷州為蜀郡唐改為益州後置大都督府及劍南節度於此天寶初改為蜀郡至德初改為成都府又陞為南京尋罷後復於此置劍南西川節度五代時王氏孟氏相繼有其地宋為益州路端拱初改為成都府元為成都路本朝改為成都府為四川道治所仍屬焉何攀成都郡人廣漢郡名注見漢成帝鴻嘉三年李穀郡人朝之孫王濬弘農湖

人成都國名注見益州梁州注見周赧王四年漢中郡建平郡名注見太康元年

發明

益州殺其刺史何以不書反胡夷自相殘賊而欲盛夏出軍討之召爨啟禍故以州書之

若一州之民相與殺其刺史然耳王濬不請于朝何以不書矯賊賊主將人得誅之何請之有故書討以正州兵之罪此所謂輕重之權衡也

秋七月晉以賈充為司空考異

謹按凡例親戚書其屬此當書晉以太子妃父

充為司空

充與侍中任愷皆為晉主所寵任充欲專名勢而忌愷於是朝士各有朋黨晉主召充愷宴而謂之曰朝廷宜壹大臣當和充愷拜謝既而以晉主知而不責愈無所憚外相崇重內怨益深充乃薦愷出為吏部

尚書而與荀勗馮紕共諧之愷由是得罪廢於家

九月吳步闡據西陵叛降晉

闡世在西陵至是吳主徵之闡自集覽西陵即夷陵也三國魏置

臨江郡蜀置宜都吳曰西陵郡隋改曰夷陵縣有西陵峽質實西陵

注見周赧王三十六年

冬十月朔日食○十一月吳陸抗拔西陵誅步闡晉羊

祜等救之不及

吳陸抗聞步闡叛急遣將軍吾彥討之而晉遣荊州刺史楊肇迎闡羊祜出江陵徐允擊建平以救之抗

救西陵諸軍築嚴圍自赤谿至于故市內以圍闡外
禦晉兵晝夜催切衆甚苦之諸將諫曰今宜乘銳攻
闡何事於圍以敵士民之力抗曰北城勢固糧足凡
備禦之具皆抗宿規今反攻之不可猝拔北兵至而
無備表裏受難何以禦之諸將請不已抗欲服衆心
聽令一攻果無利圍始合而祐兵五萬至江陵諸將
咸以抗不宜上抗曰江陵城固兵足無可憂者假令
敵得之必不能守所損者小若晉據西陵則南山羣
夷皆動其患不可量也乃帥衆赴西陵初抗於江陵
北作大堰遏水以絕寇叛祐欲因水運糧而揚聲將
破堰以通步軍抗聞即決之諸將皆惑屢諫不聽祐
至當陽聞堰敗乃以車運大費功力十一月肇至西
陵抗自將憑圍對之都督俞贊亡詣肇抗曰贊舊吏
知吾虛實吾常慮夷兵素不簡練若敵攻圍必先此
處即夜易夷兵以精兵守之明日肇果攻故夷兵處
衆敗夜遁抗欲追之而慮闡伺間兵不足分於是但

鳴鼓若將追者肇衆克懼悉解甲挺走抗使輕兵躡之肇又大敗祐等皆引軍還抗遂拔西陵誅闡及同謀將吏數十人皆夷三族東還樂鄉貌無矜色吳主既克西陵志益張大使衛士尚廣筮取天下對曰吉庚子歲青蓋當入洛陽吳主喜不修德政專為兼并之計祐歸自江陵務修德信以懷吳人每交兵刻日方戰不為掩襲之計將帥有欲進譎計者輒飲以醇酒使不得言軍行吳境刈穀為糧皆計所侵送絹償之每遊獵常止晉地所得禽獸或先為吳人所傷者皆送還之於是吳邊人皆悅服祐與陸抗對境使命常通抗遺祐酒祐飲之不疑抗疾祐與之成藥抗即服之人多諫抗抗曰豈有酖人羊叔子哉抗告其邊成曰彼專為德我專為暴是不戰而自服各保分界而已無求細利吳主聞而責之抗曰一邑一鄉不可無信義況大國乎臣不如此適足彰彼之德於祐無傷也吳主用諸將謀數侵盜晉遣抗上疏曰今不

務力農富國審官任能明黜陟慎刑賞訓諸司以德
撫百姓以仁而聽諸將狗名窮兵黷武動費萬計士
卒凋瘵冠不為衰而我已大病矣爭帝王之資而昧
十百之利此人臣之姦使非國家之良策也昔齊魯
三戰魯人再克而亡不旋踵況今克獲不補所喪哉
吳主不從祜不附結中朝權貴荀勗馮統之徒皆惡
之從甥王衍嘗詣陳事辭甚清辯祜不然之行拂衣
去祜顧謂客曰王夷甫方當以盛名處大位然敗俗
傷化必此人也及攻江陵祜以軍法將斬王戎衍戎
之從弟也故皆懷之時人為之語曰二王當國羊公
無**集覽**張大張去聲心自侈大也青蓋當入洛陽謂
德**集覽**當有銜璧之事也後八年果降晉晉書安車
朱班給青蓋車皇子為王錫以乘之故曰王青蓋車
成藥已合成熟藥叔子羊祜字而昧漢書荀昧於權
利注荀**正誤**而昧今按**質實**一統志云赤谿在荊州
昧貪也**正誤**昧昏也

吳陸抗討步闡築城之所東合大江南山在岳州府
華容縣南三十里樂鄉城名注見康帝建元元年王
衍琅邪臨沂人
長甫王衍表字

書法

書晉救之不及何嘉抗也抗聞闡叛亟遣兵
討之可謂能權矣故嘉之終綱目救書不及

三

是年羊祜留乙亥年王琳

同上齊遣兵惟齊為譏辭

晉免其國子祭酒庾純官尋復用之

賈充與朝士宴河南尹庾純醉與充爭言充曰父老
不歸養卿為無天地純曰高貴鄉公何在充慙怒上
表解職純亦自劾詔免純官仍下五府正其臧否石
苞以純崇宦忘親當除名齊王攸以為純於禮律未
有違者詔復
集覽 高貴鄉公何在初魏主高貴鄉公
帥府衛出攻司馬昭中護軍賈充
以純為祭酒

自外入令成濟弑之今庾純故云然

發明

以違養責庾純宜其取高貴鄉公之問也然晉方護養姦回遂免純官既而內愧於心尋復用之綱目所以特筆起義欲使後人推考而得之也

吳殺其丞相萬彧將軍留平大司農樓玄

吳主之遊華里也萬彧與將軍留平密謀曰若至華里不歸社稷事重不得不自還吳主頗聞之因會以毒酒飲或及平不死或自殺平憂慙而卒初或請選忠清之士以補近職吳主以樓元為宮下鎮主殿中事元正身帥衆奉法而行應對切直吳主主浸不悅中書令賀邵諫曰臣聞興國之君樂聞其過荒亂之主樂聞其譽聞其過者過日消而福臻聞其譽者譽日損而禍至陛下嚴刑法以禁直辭然善士以逆諫口

杯酒造次生死不保是以正士摧方庸臣苟媚人執
反理之評士吐詭道之論遂使仕者以退為幸居者
以出為福非所以保洪緒也何定妄興事役發江邊
戍兵以驅麋鹿老弱飢凍大小怨歎傳曰國之興也
視民如赤子其亡也以民為草芥今法禁轉苛賦調
益繁呼嗟之聲感傷和氣且國無一年之儲家無經
月之蓄而後宮坐食萬有餘人北國注目伺國威寒
長江之限不可久恃苟不能守一葦可航也願陛下
豐基彊本割情從道則聖祖之祚隆矣吳主深恨之
於是左右誣元與邵謗訕政事俱被詰責徙立於交
趾竟**集覽**宮下鎮官名也主殿中
殺之事摧方摧折其剛方

書法

或平扈從而思逃不無罪矣曷為與樓玄並
書殺綱目澄源正本畧或早所以罪吳主也

其為盤遊
之戒深矣

發明

孫皓前殺王蕃已書于冊猶曰無僚云耳今又以無罪殺其將相大臣列書于此所以著

其亂亡之迹也然則吳之亡也豈俟王濬進軍而後及乎

癸晉泰始九年夏四月朔日食○晉以鄧艾孫朗為郎
已吳鳳凰二年

中

初鄧艾之死人皆寃之而無為之辨者及晉主即位儀郎段灼上疏曰艾本屯田掌犢人寵位已極功名已成七十老公復何所求正以劉禪初降遠郡未附矯令承制權安社稷鍾會有悖逆之心畏艾威名固其疑似構成其事艾被詔書即束身就縛誠知奉見先帝必無當死之理也會受誅之後艾將吏愚慙自共追艾解其因執艾在困地未嘗與謀而獨受腹背之誅豈不哀哉謂宜聽艾歸葬還其田宅繼封定諡

則艾死無所恨而天下徇名之士思立功之臣必投湯火樂為陛下死矣晉主善其言而不能從也至是問給事中樊建以諸葛亮之治蜀曰吾獨不得如亮者而臣之乎建稽首曰陛下知鄧艾之冤而不能直雖得亮得無如馮唐之言乎晉主**集覽**馮唐之言漢笑曰卿言起我意乃以朗為郎中**集覽**馮唐之言漢數言趙將李齊之賢馮唐曰齊不如廉頗李牧帝曰吾獨不得頗牧為將唐曰陛下雖有頗牧不能用也

質實

馮唐之言事見漢文帝十四年

書法

拜官未有書某孫者書鄧艾孫何記功也是故書用鄧艾孫朗所以志晉武之記功書殺

桓冲孫允所以志劉裕之賊善安帝義熙三年

吳主殺其侍中韋昭

吳人多言祥瑞者吳主以問昭昭曰此家人筐篚中物耳昭領國史吳主欲為其父作紀昭曰文皇不登帝位當為傳吳主不悅昭求去不聽吳主飲羣臣酒不問能者率以七升為限至昭獨以茶代後更見強又酒後常使侍臣嘲弄公卿發摘私短以為集覽作歡昭但難問經義而已吳主積怒遂誅之索隱曰紀者記也本其事而記之故曰本紀又紀理也絲縷有紀而帝王書稱紀者言為後代綱紀也為傳索隱曰列傳者謂叙列人臣事跡今可傳於後世故曰列傳正義曰其人行跡可序列故云列傳發摘摘與撻通他歷反謂舉發挑摘其私隱

秋七月朔日食○晉選公卿女備六宮

晉主詔選公卿以下女備六宮有蔽匿者以不敬論采擇未畢權禁天下嫁娶公卿女中選者為三夫人

九嬪二千石將校
集覽 九嬪注見宋武帝永初三年
女補良人以下
嬪御良人東漢皇后紀秦并

天下宮備七國爵列八品注正嫡稱皇后妾皆稱
夫人又有美人良人八子七子長使少使之號

書法

書選女入宮始此綱目書宋選入宮五是年
甲午年太康二年唐太宗貞觀十三年後唐

乙酉年唯貞觀

書詔為豫辭

九月吳殺其司市陳聲

吳主愛姬遣人至市奪民物聲繩之以法吳主
怒假他事燒鋸斷聲頭投其身於四望之下
集覽

四望亭名也在太平州當塗縣東或
云四望地名在寧國府北六十里
正誤 四望今按
晉書溫嶠

傳嶠討蘇峻於石頭結壘於四望磯
南史石頭有四望山蓋山下有磯也
質實 一統志云
四望山名

在應天府城西北二十里西臨大江南連石城北接
獅子吳大帝嘗與葛元共登焉晉溫嶠伐蘇峻亦築
壘於此以
逼之即此

甲晉泰始十年春正月日食○晉詔自今不得以妾媵
為正嫡

晉主以近世多由內寵以登
后妃亂尊卑之序故有是詔

三月日食○晉取良家女入宮

詔又取良家及小將吏女五千餘人入
宮選之母子號哭於宮中聲聞於外

書法
往年選公卿女矣於是復取良家女
而多至五千人書選可也書取甚哉

發明

太王好色必使內無怨女外無曠夫此猶是孟子為齊君言之耳晉武沈溺內慾去年方

書選公卿女備六宮今此又書取良家女入宮則其遊宴後庭之失固不俟平吳而後見也喪軀亡國咎將誰歸書之以為鑒耳

吳殺其章安侯奮質實

一統志云章安漢之縣名屬臨海郡三國吳因之晉末省入臨

海縣故城在台州府城東一百一十五里

吳民間訛言奮當為天子吳主誅之及其五子

秋七月晉后楊氏殂

初晉主以太子不慧恐不堪為嗣常密以訪后后曰立子以長不以賢豈可動也疾篤恐晉主更立后以

危太子泣而言曰叔父駿女並有德色願以備六宮
晉主許之既葬晉主及羣臣除喪博士陳遠議以為
今時所行漢帝權制太子無國事自宜終服尚書杜
預曰古者天子諸侯三年之喪始同齊斬既葬除服
諒闇以居心喪終制故周公不言高宗服喪三年而
云諒闇此服心喪之文也叔向不譏景王除喪而譏
其宴樂已早明既葬應除而違諒闇之節也君子之
於禮存諸內而已禮非玉帛之謂喪豈衰麻之謂乎
太子出則撫軍守則監國不為無事宜卒哭除衰麻
而以諒闇終三年晉主從之司馬公曰規矩主於方
圓然庸工無規矩則方圓不可得而制也衰麻主於
哀戚然庸人無衰麻則哀戚不可得而勉也杜預巧
飾經傳以附人情辯則辯矣然集覽漢帝權制漢文
不若陳遠之言質畧而敦實也後七年遺詔短
喪齊斬齊衰注見漢宣帝元康元年斬衰注見漢昭
帝元平元年諒闇注同上年周公不言高宗服喪三

年記喪服四制書曰高宗諒闇三年不言善之也何以獨善之曰高宗者武丁武丁者殷之賢王也故善之善之故載之書中而高之故謂之高宗書無逸周公曰我聞曰其在高宗時舊勞于外作其即位乃或亮陰三年不言武丁其父小乙使之久居民間起其即王位則小乙死乃有信默三年不言言孝行著叔向不譏景王除喪叔向姓羊舌氏名肸春秋晉之公族也周景王名貴左傳昭十五年景王穆后崩晉荀躒如周葬穆后籍談為介既葬除喪以文伯宴籍談歸以告叔向叔向曰王一歲而有三年之喪二馬於是乎以喪賓宴樂憂甚矣王其不終乎三年之喪雖貴遂服禮也王雖弗遂宴樂已早亦非禮也向音享肸許乙反衰麻哀音食回反喪衣也杜預曰棄在冑前當心用布長六寸博四寸綴於左衽之前

晉以山濤為吏部尚書

濤典選十餘年每一官缺輒擇才資可為者啟擬數人得詔旨所向然後顯奏之晉主所用或非舉首衆以濤輕重任意為言晉主益親愛之濤甄集覽甄拔人物各為題目而奏之時稱山公啟事延反察也拔擢也後漢爰延傳正誤非舉首今按謂王者爵人甄其德注甄明也傳褒然為舉首也漢書董仲舒

書法

吏部尚書未有書者書山濤何善其職也書吏部尚書始此終綱目書以為吏部尚書二

十山濤蔡廓江湛謝莊等蔡興宗等興宗再書祐

馬周褚遂良裴光庭楊國忠知選事三劉祥道李嶠宋昱兩晉所書山濤一人而已矣

晉以嵇紹為祕書丞

紹康之子也以父得罪屏居私門至是山濤薦徵之
紹欲辭不就濤謂之曰為君思之久矣天地四時猶
有消息况於人乎紹乃應命初東關之敗文帝問寮
屬曰近日之事誰任其咎安東司馬王儀對曰責在
元帥文帝怒曰司馬欲委罪於孤邪斬之儀子哀痛
父非命隱居教授三徵七辟皆不就未嘗西向而坐
廬於墓側旦夕攀栢悲號涕淚著樹樹為之枯讀詩
至哀哀父母生我劬勞未嘗不三復流涕門人為之
廢蓼莪家貧計口而田度身而蠶人或饋之不受助
之不聽諸生密為刈麥哀輒棄之遂不仕而終司馬
公曰昔舜誅鯀而禹事舜不敢廢至公也嵇康王儀
死皆不以其罪二子不仕晉室可也嵇紹苟無蕩陰
之忠殆不免於**集覽**廢蓼莪廢不讀也蓼莪注見漢
君子之譏乎**和帝**永元十五年蕩陰之忠蕩
陰之戰嵇紹死之事**質實**東關注見漢後
在惠帝永興元年**質實**主建興六年

吳大司馬荊州牧陸抗卒

抗疾病上疏曰西陵建平國之藩表既處上流受敵二境若敵汎舟順流星奔雷邁非可恃援他部以救倒縣此乃社稷安危之機也臣父遜昔上言西陵國之西門雖云易守亦復易失若有不守非但失一郡荊州非吳有也如其有虞當傾國爭之今臣所統見兵財有數萬羸敝日久難以待變臣以為諸王幼冲無用兵馬及黃門宦官開立占募之人乞特詔簡閱以補疆場受敵常處使臣所部足滿八萬并力備禦庶幾無虞臣死之後乞以西方為屬及卒吳主使其子晏景元機雲分將其兵機雲皆善屬文名重於世初周魴之子處膂力絕人不修細行鄉里患之處嘗問父老曰今時和歲豐而人不樂何邪父老歎曰三害不除何樂之有處曰何謂也曰南山白額虎長橋蛟并子為三矣處曰若所患止此吾能除之乃射虎

殺蛟遂從機雲受學篤志讀書集覽疆場受敵常處
砥節殲行比及暮年州府交辟句絕疆場注見
漢靈帝建質實周魴陽羨人南山未詳處所一統志
寧二年云長橋在常州府宜興縣治南後漢
表府君造晉周處斬蛟
於此元改名萬安橋

晉作河橋

杜預以孟津渡險請建河橋於富平津議者以為殷
周所都歷聖賢而不作者必不可立故也預固請為
之及橋成晉主從百寮臨會舉觴屬預曰非君集覽
此橋不立對曰非陛下之明臣亦無所施其巧
河橋說文水梁也以舟相比為梁而質實孟津地名
渡杜預曰造舟為梁則河橋之謂也注見漢帝
更始二年一統志云河橋在河南府孟津縣晉杜預
以孟津渡險請建河橋於富平津議者難之預曰造

舟為梁則河橋之謂也卒
成之富平津未詳處所

書法

書作河橋記功也書作橋始此終綱目書作橋三
是年河橋唐玄宗開元九年蒲津憲宗

元和八年
吐蕃烏蘭

晉邵陵公曹芳卒

謚曰厲初芳之廢也太宰中郎陳留范粲素服拜送
哀動左右遂稱疾陽狂不言寢所乘車足不履地子
孫有婚宦大事輒密諮焉合者則色不變不合則眠
寢不安子喬等侍疾家庭足不出邑里及晉代魏詔
以二千石祿養病加賜帛百匹喬以父疾篤辭不敢
受粲不言凡三十六年年八十四終於所寢之車
質實 一統志云邵陵三國吳之郡名屬荊州晉宋齊
梁并為邵陵國後復為郡隋初罷郡以其地屬

潭州開皇中置建州治邵陽尋廢唐置南梁州貞觀中改為邵州天寶初又改邵陽郡乾元初復為邵州五代晉時改為敬州宋仍為邵州後陞為寶慶府元改為寶慶路本朝仍改為府屬湖廣道陳留縣名注見秦二世三年

書法

於是邵陵廢二十一年矣及晉始辛魏之俗猶近厚也故書予之

吳比三年大疫

書法

綱目書疫十五未有書比三年者三年大疫民何如哉吳之亡決矣

乙晉咸寧元年春正月吳殺其中書令賀邵未吳天冊元年

邵中風不能言吳主疑其詐收掠千數卒無一語乃燒鋸斷其頭徙其家於臨海

集覽

收掠收繫

累也掠音
亮答擊也
質實
臨海縣名注見宋
明帝泰始六年

夏六月索頭遣子入貢於晉

索頭拓跋力微復遣其子沙漠汗入貢于晉將還幽
州刺史衛瓘表留之又密賂其諸部大人離間之

集覽

拓跋力微拓跋復姓力微其名即北魏神元帝
也其先出自黃帝黃帝以土德王北俗謂土為

拓謂后為跋故以為氏至孝文帝
改姓元氏沙漠汗名也汗音寒

秋七月晦日食○冬晉追尊祖宗廟

宣帝為高祖景帝為
世宗文帝為太祖

晉大疫

丙晉咸寧二年
申吳天璽元年

春晉徙河南尹夏侯和為光祿勳

晉主得疾甚劇及愈羣臣上壽詔曰每念疫死者為之愴然豈以一身之休息而忘百姓邪諸上禮者皆絕之初文帝臨終為晉主叙淮南王陳思王事而泣執齊王攸手以授之太后臨終亦流涕謂晉主曰挑符性急而汝為兄不慈恐不能相容以是屬汝勿忘我言及是疾甚朝野皆屬意於攸攸妃賁充是女也河南尹夏侯和謂充曰卿二壻親踈等耳立人當立德充不答攸素惡荀勗馮紇傾諂至是勗使紇說晉主曰陛下前日疾苦不愈齊王為公卿百姓所歸太子雖欲高讓其得免乎宜遣還藩鎮晉主陰納之乃徙和為光祿勳充集覽文帝司馬昭也武帝受魏兵權而位遇無替禪追尊曰文帝淮南王陳思王事漢淮南厲王名長高帝少子也文帝即位長自以最親驕蹇被廢處蜀嚴道邛郵不食而死三國

魏陳思王名植武帝子也文帝即位以植醉酒悖慢
貶爵徙封遂發疾薨桃符齊王攸小字位遇位職位
也過禮
待也

秋八月吳臨平湖開石印封發

吳人或言於吳主曰臨平湖自漢末歲塞長老言湖
塞天下亂湖開天下平近者無故忽開此天下當大
平青蓋入洛之祥也吳主以問都尉陳訓對曰臣止
能望氣不能達湖之開塞退而告其友曰青蓋入洛
者銜璧之事也初吳人掘地得銀尺上有刻文吳主
因改元天冊至是或獻小石刻皇帝字又改元天璽
八月歷陽長又上言歷陽山石印封發俗謂當太平
吳主遣使者祠之使者作高梯登其上以朱書石還
以聞吳主大喜封其山為集覽
歲塞歲蕪也荀子涂
王又改明年元曰天紀

見之禮皆有所執以為贄公侯伯子男執玉賁遠
曰銜璧者蓋以其手縛於後不能執璧故銜之質

實一統志云臨平湖在杭州府城東北六十里舊名
鼎湖自漢末壅塞晉咸寧中復開父老相傳云此

湖開天下平故云臨平歷陽縣名注見漢冲帝永嘉
元年歷陽山在和州城西北四十里江表傳歷陽縣

有石山謂之石印封發天下當
太平吳孫皓嘗遣使祭以太牢

書法

書識也吳亡距此四年耳君臣上下方以為
祥焉下書晉加羊祜征南大將軍綱目之垂

戒深矣吳臨平湖開而吳亡陳臨平湖開而陳滅
率不過三四年耳變不虛生信哉綱目書湖開二

是年陳

丁未年

發明

孫皓淫刑亂殺罪浮于桀而湖開印發誇詡
為瑞書之亦以著其狂悖不知滅亡之兆云

耳

吳殺其郡守張詠車浚尚書熊睦

詠為湘東太守不出算緡吳主斬之狗首諸郡浚為
會稽太守公清有政績值郡旱饑表求賑貸吳主以
為收私恩遣使梟首睦微有所諫

集覽

吳主以
武帝元狩四

年率緡錢二
十而一算

質實

湘東郡名注見宋文帝元嘉十五年
衡陽會稽郡名注見漢和帝永

年元元

冬十月晉加羊祜征南大將軍

祜上疏請伐吳曰期運雖天所授而功業必因人而
成不一大舉掃滅則兵役無時得息也夫謀之雖多

決之欲獨凡以險阻得全者謂其勢均力敵耳若輕重不齊強弱異勢雖有險阻不可保也蜀之為國皆云一大荷戟千人莫當及進兵之日曾無藩籬之限乘勝席卷徑至成都漢中諸城皆烏桕而不敢出誠以力不足以相抗也今江淮之險不如劍閣孫皓之暴過於劉禪吳人之困甚於巴蜀而大晉兵力盛於往時而不於此際平一四海而更阻兵相守使天下困於征伐經歷盛衰不可長久也今若引梁益之兵水陸俱下荆楚之眾進臨江陵平南豫州直指夏口徐揚青兗並會秣陵以一隅之吳當天下之眾勢分形散所備皆急一處傾壞則上下震蕩雖有智者不能為吳謀矣吳緣江為國東西數千里所敵者大無有寧息孫皓恣虐將疑士困平日猶懷去就兵臨必有應者兼其俗急速不能持久弓弩戰楯不如中國惟有水戰是其所便一入其境則長江非復所保還趣城池去長入短非吾敵也晉主深納之議者多有

不同賈充荀勗馮純尤以為不可祔歎曰天下不如
意事十常居七八天與不取豈非更事者恨於後時
哉惟杜預及中書令張華集覽秣陵注見漢獻
與晉主意合贊成其計帝興平二年質實

梁益二州名梁注見周赧王
四年漢中益注見泰始八年

晉立后楊氏以后父駿為車騎將軍

晉主初聘后后叔父珣上表曰自古一門二后未有
能全其宗者乞藏此表於宗廟異日得以免禍晉主
許之竟立后而以駿為將軍封侯尚書褚碧郭奕皆
表駿小器不可任社稷之重晉主不從駿驕傲自得
鎮軍胡奮謂曰卿恃女更益豪邪歷觀前集覽珣余
世與天家婚未有不源門者但早晚事耳招反
碧力灼反奕慶益反天家天子之稱也義取三王家
天下蔡邕獨斷曰天家百官小史之所稱天子無外

以天下為家故稱天家
親近侍從官稱大家
質實
楊駿弘農人郭奕陽曲人

丁晉卿等三年春正月朔日食○三月晉討樹機能破

之降諸胡二十萬口考異

此亦誤書討五年書馬隆討樹機能亦誤
考證
討當

作○秋七月有星孛于紫宮○晉詔遣諸王就國封功

臣為公侯

衛將軍楊璠等建議以為古者封建諸侯所以藩衛王室今諸王公皆在京師非扞城之義又異姓諸將居邊宜參以親戚晉主乃詔諸王各以戶邑多少為三等大國置三軍五千人次國二軍三千人小國一軍一千一百人諸王為都督者各徙其國使相近八月徙亮為汝南王督豫州倫為趙王督鄴城輔為太

原王監并州。他在徐州徙封琅邪。駿在關中徙封扶風。又徙顯為河間王。東為南陽王。其無官者皆遣就國。諸王公戀京師。皆涕泣而去。又封皇子瑋。允該。遐。皆為王。其異姓之臣有大功者。皆封郡公。郡侯。○羊祜封南城。郡侯。固辭不受。祜每拜官。爵多避讓。誠心素著。故特見申於分列之外。歷事二世。職典樞要。凡謀議皆焚其草。世莫得聞。所進達之人。皆不知。所由嘗曰。拜官公朝。謝恩私門。吾所不取也。
年干城分列分音扶問反

集覽

晉大水○冬十二月吳人襲晉江夏汝南大畧而還

吳人襲晉江夏汝南畧千餘家。晉主遣侍臣詰羊祜不追討之意。并欲移荊州。祜曰。江夏去襄陽八百里。比知賊問去。已經日步軍安能追之。勞師以免責。非臣志也。昔魏武帝置都督。類皆與州相近。以兵勢好。

合慈離故也。疆場之間一彼一此，鎮守而已。質實江夏，若輒徙州，賊出無常，亦未知州之所宜據也。郡名注見唐僖宗乾符四年，汝南郡名注見漢光武建武十九年。

吳司直中郎將張儉伏誅

吳主以儉多所諧白，甚見寵任。儉表置彈射二十人，專糾司不法，於是吏民各以愛憎互相告訐。獄犴盈溢，至是儉姦利，集覽：獄犴，犴本作斬，音岸。胡地野犬，事發車裂之。

崔駰傳：獄犴填滿，注：鄉亭之繫曰犴。朝廷曰獄。案犴通作岸，詩小宛篇：宜岸宜獄。注：岸，訟也。

書法

叙以善諧取寵，至是以姦利事誅，則罪人也。故孫皓自即位至今，凡九書殺，惟張儉以伏

誅，書綱目之疾，讒說嚴矣。

發明

姦回之人得志亂世然亦未必能免孫皓淫虐而張淑以讒譖用可謂弁之春而稼之秋

矣未幾亦以誅死綱目書之其亦警戒小人也歟

索頭拓跋力微死

衛瓘遣拓跋沙漢汗歸國諸部大人共譖而殺之力微以憂卒時年一百四子悉祿立其國遂衰初幽并二州皆與鮮卑接東有務桓西有力微多為邊患瓘密以計間之務桓降而力微死朝廷嘉瓘功封其弟為亭質實幽州注見唐高祖武德四年并州注見晉侯愨帝建興四年鮮卑國名注見梁武帝大同十年突厥亭縣名未詳處所

戊戌晉咸寧四年
戊戌吳天紀二年

春正月朔日食○夏六月晉羊祜入朝

祐以病求入朝既至晉主命乘輦入殿不拜而坐祐面陳伐吳之計晉主善之以祐病不宜數入更遣張華就問籌策祐曰孫皓暴虐已甚於今可不戰而克若皓沒更立令主雖有百萬之衆長江未可窺也華深然之祐曰成吾志者子也晉主欲使祐卧護諸軍祐曰取吳不必臣行但既平之後當勞聖慮耳功名之際臣不敢居若事了當有所付授願審擇其人也

秋晉大水螟

詔以水災問主者何以佐百姓杜預上疏以為今者水災東南尤劇宜救充豫等州留漢氏舊陂以蓄水餘皆決漑今飢者得魚菜螺蚌之饒此目下日給之益也水去之後填淤之田畝取數鍾此又明年之益也典牧種牛有四萬五千餘頭可給民使耕種責其租稅此又數年以後之益也晉主從之民賴其利預

在尚書七年損益庶政不可勝數時集覽螺蚌亦人謂之牡武庫言其無所不有也與蚌同蜃屬說文蛤也填淤填塞也淤依據反說文澱滓濁泥也字或作淤又通作閼史記河渠書填閼水之

書法

終綱目書螟五詳漢武帝元光五年舍是無書者矣史失之也

吳殺其中書令張尚

吳主忌勝己者尚為人辯捷談論每出其表吳主積以致恨後問孤飲酒可以方誰尚曰陛下有百觚之量吳主曰尚知孔子不王集覽百觚觚鄉飲酒之爵而以孤方之因發怒殺之也受三升又韓詩外傳一升曰觚觚之義正誤百觚今按孔叢子平原君寡也飲常寡少也強子高酒曰堯舜千鍾孔

子百觚子路嗑嗑尚飲百榼子何辭焉吳主以孔子能飲百觚故曰張尚知孔丑不王而以我比之也

書法

自甲申至是綱目几十一書殺皆殺無罪也而孫皓居其十皓之淫虐如此不亡得乎

冬晉以衛瓘為尚書令

是時朝野咸知太子昏愚不堪為嗣瓘欲啟而不敢會侍宴凌雲臺瓘陽醉跪晉王前欲言而止者三因以手撫牀曰此座可惜晉主意悟因謬曰公真大醉邪遂悉召東宮官宴而密封尚書疑事令太子決之賈妃大懼倩外人代對多引古義給使張泓曰太子不學陛下所知不如直以意對妃喜謂泓曰便與我好答富貴與汝共之泓即具草令太子自寫晉主省之甚悅先以示瓘瓘大踧踖衆人乃知瓘嘗有是言賈充密遣人語妃云質實一統志云凌雲臺在河南衛瓘老奴幾破汝家質實府洛陽縣舊寧陽門外冰

井北魏文帝所築高二十三丈登之可見蓋
津臺上樓觀精巧謝舉王褒俱有凌雲臺曲

吳人大佃皖城晉人攻破之

吳人大佃皖城謀寇晉邊晉都督揚州軍事王渾遣
兵攻破之斬首五千級焚其積穀百八十餘萬斛踐
稻苗四十餘頃集覽大佃皖城佃音甸案廣韻注營
毀船六百餘艘田也大廣營田於皖城也皖城
注見漢獻帝質實王渾晉陽
建安四年人景之子

十一月晉詔毋得獻奇技異服

晉大醫司馬程據獻雉頭裘集覽雉頭裘以雉
晉主焚之於殿前因有是詔頭毛織為裘

晉以杜預為鎮南大將軍都督荊州諸軍事鉅平侯羊

祐卒

祐疾篤舉預自代而卒晉主哭之甚哀祐遺令不得以南城侯印入樞晉主曰祐固辭歷年身沒讓存今聽復奉封以彰高美謚曰成南州民聞祐卒罷市巷哭吳守邊將士亦為之泣祐好遊岷山襄陽人建碑立廟於其地歲時祭祀望其碑者無不流涕因謂之墮淚碑預至鎮簡精銳襲吳西陵督張政大破之政吳之名將也耻敗不以實告吳主預欲間之集覽乃表其其所獲吳主吳召政遂遣留憲代之集覽岷山臨漢上望之隱然襄陽郡志岷山亘其南檀溪帶其質實一統志云鉅平漢之縣名屬奉山郡三國魏西質實以後仍舊晉未省之故城在兗州府寧陽縣境內岷山在襄陽府城南七里晉羊祐每登此山置酒嘗謂從事鄒湛曰自有宇宙便有此山由來賢哲

登此者多矣皆湮滅無聞湛對曰公德冠四海聞望當與此山俱傳祐歿襄人感其德立祠刻碑其上見者莫不流涕墮淚碑在襄陽府治東九里晉羊祜鎮襄陽有功德於人百姓於峴山建碑立廟望其碑者莫不流涕杜預因名墮淚碑

晉司空何曾卒

曾厚自奉養過於人主司隸劉毅數劾之晉主不問及卒博士秦秀議曰曾驕侈過度名被九域若生極其情死又無貶王公貴人復何畏哉謹按謚法名與實爽曰繆怙亂肆行曰醜宜謚繆醜公晉主策謚曰孝
集覽 謚法注見泰始
質實 劉毅披人
皇二十六年

晉清泉侯傅玄卒

玄性峻急為司隸每有奏劾或值日暮捧白簡整簪帶竦踊不寐坐而待旦由是貴游震攝臺閣生風卒謚曰剛玄與尚書左丞崔洪善洪亦清厲骨鯁好面折人過而退無後言人以是重之

集覽

骨鯁

鯁通作鯁音古杏反韻會舉要注徐氏曰古有骨鯁之臣遇事敢刺鯁不從俗也一說骨鯁蹇諤之臣謂直言難受如骨之味咽也歐陽氏曰骨鯁二字或作骨鯁說者多誤以骨刺喉為說宋景文以骨強四支冠其上以骨書之蓋欲正世人之失又於本贊尾後出鯁正一語蓋欲互見二字可通用二字訓堅強正直之義骨鯁猶質實清泉縣名言骨立之類未詳處所

已晉咸寧五年春正月樹機能陷晉涼州晉遣將軍馬

隆討之考證

陷當作入討當作擊○謹按凡例曰凡非正統而相攻先發者不曰寇而後應者不

曰征討其他悉
從本文後倣此

初樹機能久為邊患僕射李憲請發兵討之朝議皆
以為出兵重事虜不足憂至是陷涼州晉主臨朝而
歎曰誰能為我討此虜者司馬督馬隆進曰陛下能
任臣臣能平之晉主曰必能平賊何為不任顧方畧
何如耳隆曰臣願募勇士三千人無問所從來帥之
以西虜不足平也晉主許之以為討虜將軍武威太
守隆募能引弓四鈞挽弩九石者取之立標簡試自
旦至日中得三千五百人隆曰足矣又請自至武庫
選仗御史劾之晉主命惟隆
集覽四鈞三十斤為鈞
所取仍給三年軍資而遣之
九石四鈞為一石

質實

馬隆東
平人

晉以匈奴劉淵為左部帥

淵豹之子也幼而雋異師事上黨崔游博習經史嘗謂同門生曰吾嘗耻隨陸無武絳灌無文隨陸遇高帝而不能建封侯之業絳灌遇文帝而不能興庠序之教豈不惜哉於是兼學武事及長猿臂善射膂力過人姿貌魁偉為任子在洛陽王渾及其子濟皆重之屢薦於晉主晉主召與語說之濟曰淵有文武長才陛下任以東南之事吳不足平也孔恂楊珧曰非我族類其心必異淵才器誠少比然不可重任也及涼州覆沒晉主問將於李憲對曰陛下誠能發匈奴五部之衆假淵一將軍之號使將之而西樹機能之首可指日而梟也恂曰淵果梟樹機能則涼州之患方更深耳晉主乃止東萊王彌家世二千石淵有學術勇畧善騎射青州人謂之飛豹然喜任俠處士陳留董養見而謂之曰君好亂樂禍若天下有事不作士大夫矣淵與彌友善謂彌曰王季以鄉曲見知每相稱薦適足為吾患耳因歔歔流涕齊主攸聞之言

於晉主曰陛下不除劉淵臣恐并州不得久安王渾
曰大晉方以信懷殊俗奈何以無形之疑殺人侍子
乎何德度之不弘也晉主然**集覽**淵豹之子淵字元
之會豹卒以淵代為左部帥**海**匈奴左賢王豹
之子也初漢高以宗女為公主以妻冒頓故其子孫
遂冒姓劉氏隨陸隨何陸賁皆事漢高惠絳灌絳周
勃也封絳侯灌謂灌嬰也共立漢**質實**上黨郡名注
文帝任俠注見漢武帝元朔二年見周赧王五
十三年東萊郡名注見漢成帝永始元年
陳留郡名注見秦二世三年董養浚儀人

書法

亂華之禍始此矣綱目謹志之故為左部帥
書為匈奴北部都尉書為匈奴五部大都督

書

發明

先王別異封域置夷狄於要荒之外其有慕
義來王者亦以國門外處之所以謹華戎之

辨嚴內外之防也自曹操分匈奴為五部處之內地種類漸繁晉氏繼之盡知所革既不能然在朝之臣方且交譽劉淵之才乃欲畀之重任是所謂資寇兵借盜糧縱圍檻之虎豹而使之噬嚙於通衢者也考之分注如王濟李憲之薦甚非處夷狄之道至於齊王攸之言可謂先見甚明然亦未為有得正使一淵雖死一淵復生母亦還其部伍遣之出塞嚴為限隔之防可也書晉以匈奴劉淵為左部帥所以見五胡之亂自此兆矣噫

冬十一月晉大舉兵分道伐吳

吳主每宴羣臣咸令沈醉又置黃門郎十人為司過宴罷之後各奏闕失或剝人面或鑿人眼由是上下離心莫為盡力王濟上疏曰孫皓荒淫凶逆宜速征伐若皓死更立賢主則強敵也臣作船七年且有朽

敗臣年七十死亡無日三者一乘則難圖矣願陛下
無失事機晉主於是決意伐吳會王渾言孫皓欲北
上邊戍皆戒嚴乃更議明年出師杜預上表曰賊之
窮計力不兩完必保夏口以東少延視息無緣多兵
西上而陛下過聽便用委棄大計縱敵患生誠可惜
也向使舉而有敗勿舉可也今有萬安之舉無傾敗
之慮臣心實了不敢以曖昧之見自取後累惟陛下
察之旬月未報預復表言羊祜不博謀而與陛下計
故令朝臣多異同之議凡事當以利害相校今此舉
之利十有八九而其害止於無功耳必使朝臣言破
敗之形亦不可得直是以計不出己功不在身亦由
恃恩不慮後患而輕相同異耳自秋已來討賊之形
頗露今若又中止孫皓怖而生計徙都武昌完脩江
南諸城遠其居民城不可攻野無所掠則明年之計
亦無及矣晉主方與張華圍棊預表適至華推枰歛
手曰陛下聖武國富兵彊吳主淫虐誅殺賢能今討

之可不勞而定願勿以為疑晉主乃許之以華為度
支尚書量計運漕賈充荀勗馮紕固爭之晉主大怒
充免冠謝罪山濤退而告人曰自非聖人外寧必有
內憂今釋吳為外懼豈非算乎十一月遣將軍琅邪
王伷出涂中王渾出江西王戎出武昌胡奮出夏口
杜預出江陵王濟巴東監軍唐彬下巴蜀東西凡二
十餘萬命賈充為使持節假黃鉞大都督以冠軍揚
威副之充固陳伐吳不利且言衰老不堪元帥之任
詔曰君若不行吾便自出充乃受

集覽

少延視息延

延視喘漢書獻帝時楊阜曰何面目以視息於天下
注視與示同息生也莊子應帝王篇人皆有七竅以
視聽食息臣心實了句絕謂我此心實曉了此事直
是直猶言但也據枰枰蒲兵反謂棋局為枰外寧必
有內憂今釋吳而不伐是謂內憂也涂中正誤外寧
必音途水名出益州牧麻南山西北入滬

內憂今按左傳晉侯伐鄭楚子救鄭晉范文子不欲戰曰自非聖人外寧必有內憂盍釋楚以爲外懼乎山濤引此而言外若安寧內必有憂謂能平吳則外寧矣然既無外顧之虞則安肆自如無所忌憚內當有可憂之事生何不釋吳勿伐

質實

巴東郡名注見漢獻帝建安十

九年

十二月晉馬隆破樹機能斬之涼州平

馬隆西度溫水樹機能等以衆數萬據險拒之隆以山路陘隘乃作扁箱車爲木屋施於車上轉戰而前行千餘里殺傷甚衆自隆之西音問斷絕朝廷憂之或謂已歿及隆使至晉主撫掌歡笑召羣臣謂曰若從諸卿言無涼州矣隆至武威鮮卑大人帥萬餘落來降隆與樹機能大戰斬之涼州遂平

質實


武威郡名注見漢光武建武十
年涼州注見唐中宗景龍二年

晉詔議省員吏考異

提要作
吏員

詔問朝臣以政之損益司徒長史傅咸上書以為公
私不足由設官太多當今之急在并官省役務農而
已遂議省州郡縣半吏以赴農功中書監荀勗以為
省吏不如省官省官不如省事省事不如清心昔蕭
曹相漢載其清靜民以寧一所謂清心也抑浮說簡
文案畧細苛宥小失變常以微利者必誅所謂省事
也以九寺併尚書蘭臺付三府所謂省官也若直作
大例天下之吏悉省其半恐郡國職業劇易不同不
可以一槩施之若有曠闕皆須更
集覽九寺說文寺
復或激而滋繁亦不可不重也
廷也有法度
者也釋名寺嗣也治事者相嗣續於其內也正議曰
九卿所居曰寺漢以太常光祿勳衛尉太僕廷尉大

鴻臚宗正大司農少府為九卿後魏以來卿名雖仍舊而所蒞之局則謂之寺因曰九寺也蘭臺注見漢章帝元和元年劇易猶言難易也劇竭吉反



御批資治通鑑綱目卷十六